

Faulo ena leta me Loma 'idia

Leta ana alamani weaqina

Faulo ena leta 'iuna mana nuanuana me Loma ina 'iva'ava'ata ena vayasa 'idia weaqina. Lova luvivila di'we taha taha 'idia Iesu Valena weaqina, ta me Loma nawale ge taha tuta davayausidi. 'Inega ena nuanua 'abaga nana ana tovetumaqana maega ina toa ta naiuledi, ta 'abiboda natauya di'we Sifeini 'inaya. Ba'e leta nana Faulo ena leta qabudi veqidua va'inedi, mana yani qabuna to'ekalesia edi toa Yaubada maega weaqina simana aqiaqiedi, ta wese veve'itedi tovetumaqana ma'oda ina toa 'aiqa ediavo maega. Ta leta nana ana masi nage ana avutugu ba'e 'idewani: Tomeqabu ivetumaqana Iesu 'inaya adi fata ina vetunutunuqa Yaubada matanaya vetumaqana nana 'inega. Ba'e masi nana ana alamani Faulo givesimatalia taudi me Loma weaqidi. 'Inega vonaya vonigo tomotau qabudi, taudi me Diu ta wese mali qabu luveluveifadi, e 'inega Yaubada matanaya luaqiaqiedi be ina veilage vataya. 'Inega Faulo ve'itedi taha 'eda weaqina, ta 'eda nana 'inega adi fata ina vetunutunuqa Yaubada matanaya. Ta 'eda nana ana wawa Vetumaqana ta ana alamani ba'e: 'Eguma Iesu kavetumaqanea, e 'inega ni'a kavetunutunuqa Yaubada matanaya. Ta wese vetumaqana nana 'inega Yaubada eda luveifana ana ve'ia luvematasabu vataya ni'a 'ewa yavulea 'idega.

Ta wese Faulo Yaubada ena luvineavo 'iuna weaqina givesimatalia 'idia, mana me Diu ivonaya be Mosese ena luvine ana 'abiboda 'inega adi fata otaqa ina vetunutunuqa Yaubada matanaya. Ta Faulo ve'itedi ge luvine ana matayaga 'inega Yaubada na'awahaqiaqiedi ta 'esi edi vetumaqana namo 'inega. Ta wese Faulo givesimatalia Yaubada ena nuanua me Diu ta wese mali qabu weaqidi, mana me Diu ivonaya be taudimo aqiaqidi Yaubada matanaya, mana lova Yaubada venua'ivinedi ena tomotauyavo 'idewana. Ta Faulo ve'ita aqiaqiedi tomotau qabudi adi fata be ina vetunutunuqa Yaubada matanaya 'eguma Iesu ina vetumaqanea. 'Inega Faulo me Loma ve'itedi taha tuta 'inaya me Diu taudi wese Iesu ina 'awahaqiaqiea tauna adi To'etoyavua 'idewani. Ta da'a taha taha adi 'ebelu'ovoa 'idia Faulo givesimatalia tovetumaqana weaqidi ma'oda ediavo ina veilivu 'aiqedi, ta wese ve'ita aqiaqina 'wayavia tovetumaqana edi vetofewa Yaubada 'inaya weaqina, ta wese givesimatalia ma'oda edi toluvineavo be edi gabemaniavo ina 'abiboda 'aiqedi. Ta 'wayavi 'ebelu'ovoa 'inaya Faulo lulukaiwa enavo qabudi 'idia, mana taudi Loma 'inaya itoatoa, ta tauna toa luluvai 'idiega di'we Guliki 'inaya.

Leta gamona

1:1-17 Vona lukaiwa ta leta gamona ana nuanua weaqina

1:18-3:20 Tomotau qabudi luveluveifadi, 'inega Yaubada ena luvematasabu ina lobe

3:21-4:25 'Etoyavua ge kana lobei luvine adi

'abiboda 'inega ta 'esi vetumaqana Keliso
'inaya 'inega

5:1–8:39 'Eguma Keliso maega kana ve'aidega
'inega toa vauvauna ta wese yawai vataya
kana lobe

9:1–11:36 Yaubada ena nuanua me Isileli
weaqidi mana Iesu ge ida 'awahaqiaqiea

12:1–15:13 Tovetumaqana edi ilivu weaqina to-
motau nuanidia ta wese 'ekalesia gamonaya

15:14–16:27 Faulo ena vebibina ta wese ena
lukaiwa enavo me Loma 'idia

Lukaiwa Faulo 'inega me Loma 'idia

¹ * Leta ba'e ya'a Faulo 'iguyega ya'wayavia
waiwai 'imia. Ya'a Iesu Keliso ena tofewa kavovo.
Ta Yaubada ena nuanua 'inega yavetovaletuyana,
ta venua'ivinegu be vetune 'ifoqeyegu ena Vale
Aqiaqina sabi lugaihina tomotau 'idia. ² * Lova
Vale Aqiaqina ba'e Yaubada vona fofofolea ena
tovesimasimanayavo 'idiega ena Buki Nugwenug-
weina 'inaya. ³ Ba'e Vale nana Yaubada Natuna
Iesu weaqina simasimana. Tauna vetomotau mai
bwa'obwa'oya, ta kini Deibida ena gade 'inega
vi'oi. ⁴ Ta Yaubada ena waiwaiega eda Kaiwabu
Iesu Keliso 'aligege giveya'itoto 'eviviea. Ta ba'e
giveya'itoto nana Nihoana Gwalagwalana 'inega
Yaubada ve'ita aqiaqieda Iesu vonahaqiaqi Natu
Otaqina. ⁵ * Ya'a toluveifana, 'inega ge daluaqi-
aqiegu be eda vetovaletuyana, ta 'esi Yaubada ena
nuakolokolo 'inega venua'ivinegu be yavetovale-
tuyana taudi mali qabu 'idia, 'inega taudi wese

* **1:1:** Via 9:15 * **1:2:** Lom 16:25-26 * **1:5:** Via 26:16-18;
Gal 2:7-9

Yaubada ina matayagea edi vetumaqana 'inega.
⁶ Ta wese omi'a Yaubada ena venua'ivina 'inega ni'a gabemi Ieisu Keliso ena tomotauyavo.

⁷ * Leta ba'ena ya'wayavia waiwai omi'a egwavo 'abaga qiduana Loma 'inaya otoatoa weaqimi. Omi'a tovetumaqana Yaubada veyolubemi ta gabemi ena tomotauyavo. Yavevenoqi weaqimi Tamada Yaubada be eda Kaiwabu Ieisu Keliso edi veyoluba be edi nuadaumwala ina neimi.

Faulo nuanuana qiduana 'abaga Loma ana tovetumaqanayavo navayausidi

⁸ Egwavo, nugweta nuanuagu ena vematamagilafuyemi tomotau qabudi Loma ena 'ebeluvine gamonaya emi vetumaqana Ieisu Keliso 'inaya weaqina ni'a ialamani aqiaqiea. 'Inega yalulukaiwa qiduana Yaubada 'inaya omi'a 'aidega 'aidega weaqimi. Agu fata be ba'e 'idewani ena lukaiwa 'aiqa Yaubada 'inaya Ieisu ena viaqa 'idaya weaqina. ⁹ Tuta qabuna Yaubada weaqina giwaligu qabuna 'inega yafewafewa. Ta egu fewa nana 'inaya tomotau qabudi yalulugaihi 'idia Natuna Ieisu Keliso Valena Aqiaqina weaqina. Ta Yaubada ni'a alamani aqiaqiea ya'a 'aubena ta wese velovana 'idia yavevenoqi 'inaya weaqimi.

¹⁰ * Tuta qabuna yavevenoqi waiwai Yaubada 'inaya 'eguma nahawafela be 'eda nasiwa'ea weaqigu 'inega ena wai sabi 'itami. ¹¹ Mana egu vayausa 'inaya nuanuagu be Niboana Gwalagwalana 'inega ena iulemi. Ta iula nana

* **1:7:** Naba 6:25-26 * **1:10:** Via 19:21; Lom 15:23

'inega ana fata ona vewaiwai eda Kaiwabu 'inaya. ¹² Nuanuagu qiduana ena vona iulemi be 'inega emi vetumaqana navewaiwai, ta ya'a wese nuanuagu ena vewaiwai omi'a emi vetumaqana 'inega. E ba'e 'inega omi'a be ya'a kana veiuula.

¹³ * Egwavo, ona alamani aqiaqiea lova ya'a nuanuagu qiduana eda vayausimi, ta ge agu fata mana vaina yoqona yalobedi ana laba ba'e 'itagana. Ta ni'a 'eyavuigu, 'inega nuanuagu ena wai ena 'itemi ta ena fewa nuanimia, be yaqisa vuaqa aqiaqina na'ifoqe, 'idewani lova yafewa 'aiqa mali qabu nuanidia. ¹⁴ Ya'a agu veyoveyoa Yaubada 'inega ya'ewea, 'inega Valena Aqiaqina eda tomotauyavo me Diu ta wese taudi mali qabu 'idia yaneineidi, ta wese taudi toalamani be tovemwage 'idia. ¹⁵ 'Inega wese nuanuagu agona ena wai 'imia 'abaga Loma 'inaya, ta Yaubada Valena Aqiaqina ena lugaihiea 'imia.

¹⁶ * Ya'a ge eda iniyauyau Iesu Keliso Valena Aqiaqina weaqina, ta 'esi me egu giwalifatu yalulugaihiea, mana Vale nana Yaubada ena waiwai ve'itayea, 'inega ana fata tomeqabu Vale nana ivetumaqanea e taudi 'etoyavua ina lobe Yaubada ena luvematasabu 'inega – taudi me Diu ta wese taudi mali qabu. ¹⁷ * Ta ba'e Vale nana veve'iteda ma'oda Yaubada ena viaqa 'inega ni'au givetunutunuqida matanaya. Ta ba'e vetunuqa nana ana avutugu vetumaqana, mana Buki Nugwenugweina 'inaya Yaubada vonaya, "Togama ni'a yahawatunutunuqea, e tauna ena

* **1:13:** Via 19:21 * **1:16:** Mk 8:38; 1Kol 1:18-24; Via 13:46

* **1:17:** Lom 3:21-22; Aba 2:4

vetumaqana 'iguya 'inega natoa vataya.”

Yaubada ena gamosoala ilivu luveifana weaqina

18 Ta Yaubada ena gamosoala mahalega give'ifoqeyea toveilivu veifa be tovekwavakwava 'idia. Taudi edi vekwavakwava 'inega nuanuadi Yaubada ena vona ina 'waivea mali tomotau 'idiega. 19 * Taudi toluveifa diavona Yaubada ni'a ialamani aqiaqiea, mana Yaubada taunega alamani nana ni'a a'uya nuadia. 20 * Mana kuyavata qabudi adi 'iva'ava'ata 'unu 'inega tomotau qabudi Yaubada ena waiwai 'eno'eno vatayana be wese yawaina aqiaqi otaqina ni'a i'itedi. Ta wese ena viaqayavo 'idiega taunega ve'itayea vonigo tauna vonahaqiaqi Yaubada. 'Inega ge taha toga ana fata Yaubada navegeqei ta navonaya, “Ya'a ge eda alamanian vonigo Yaubada totoa.” 21 * Vonahaqiaqi, tomotau ni'a ialamanian Yaubada totoa, ta ge nuanuadi ina awatuboi nage ina lukaiwa 'inaya ena viaqayavo weaqidi. Ta 'esi taudiega edi vekwavakwava 'inega inuanua veifa Yaubada weaqina. Ta edi nuanua diavona 'idiega taudiega igivenuavoqanidi, ta wese ge adi fata ilivu simasimalidi ina viaqidi. 22 * Taudiega isimana tomotau 'idia vonigo taudi toalamani qiduadi, ta 'esi ivekwavakwava otaqa. 23 * Ta wese ge nuadi Yaubada aqiaqi otaqina ta totoa vatayana ina awatuboi, ta 'esi tokwalui dayadayaqidi adi 'ita kavona tomotau

* 1:19: Via 14:15-17; 17:24-28 * 1:20: Iob 12:7-9; Same 19:1

* 1:21: Efe 4:17-18 * 1:22: Iel 10:14; 1Kol 1:20 * 1:23: Luve 4:15-19; Same 106:20

otaqa be, manuqa be, yubai ta wese mwata iawahawatubodi.

²⁴ 'Inega Yaubada awafeledi be taudiega edi nuanua ina viaqidi. 'Inega ilivu iniyauyau 'avana edi nuanua luveifadi 'idiega iviaqidi 'idewani velamo'eno kavokavovo. Ta ba'e ilivu diavona 'idiega taudiega 'wafidi igivebwavuya. ²⁵ Ta tola'ai ni'a ialamania Yaubada weaqina ge nuadi ina vetumaqanei, ta 'esi taudiega edi vetumaqana ia'uya u'ava 'inaya. Ta ba'e 'inega iawahawatubo Yaubada ena viaqayavo 'idia, ta Toviaqa nana ge ida awatuboya. Luaqiaqieda be tauna kana awatuboya tuta vataya 'idia. Vonahaqiaqi, eda nuanua 'idewani.

²⁶ Ba'e 'iuna 'inega Yaubada awafeledi edi ilivu iniyauyau 'avadi 'idia. 'Inega vivine 'eno ana luvine aqiaqina inogea ta ge nuadi 'oloto maega ina 'eno, ta 'esi vivine ediavo maega ivelamo'eno kavokavovo. ²⁷ * Ta wese 'oloto 'idewani ge nuadi vivine maega ina 'eno, ta 'esi nuanuadi qiduana 'oloto ediavo maega ilivu iniyauyau 'avana ina viaqidi. Ta ba'e ilivu diavona 'idiega taudiega iveveilageyedi, mana ilivu nana ana ve'ia luve-matasabu qiduana.

²⁸ Ta tuta nana edi alamani Yaubada weaqina inogea, e 'inega Yaubada awafeledi be edi nuanua luveifadi ina viaqidi. Ta ba'e ilivu diavona ge taha toga daluaqiaqiei be naviaqi Yaubada matanaya, ta taudi tua iviaviaqidi. ²⁹ Tuta qabuna ilivu luveluveifadi iviaviaqidi, 'idewani ilivu kwavakwavana be, vemanuguba be, ve'idi'idi be, ve'ifi'ifi be, luve'aliga be, vedavi be, suluva be,

* **1:27:** Luvi 18:22; 20:13; 1Kol 6:9

awagila ta wese vevonavona tomotau weaqidi. ³⁰ Ta wese tomotau i'awaluveifedi be, Yaubada ivevoalanea be, tomotau iawawe buiedi be, taudiega igivaneyedi ta wese igagasa. Tuta qabuna 'eda taha taha ilivu luveifana weaqina isalisalia, ta tamadiavo be inadiavo ge ida matayagedi. ³¹ Taudi ge ida nuanua tola'ai aqiaqina nage tola'ai luveifana. Ta ge taha edi vetumaqanamo be, ge taha nuakolokolo 'idia da'eno'eno, ta wese ge taha nuataqo 'idia da'eno'eno. ³² Taudi ni'a ialamani aqiaqiea Yaubada ena luvematasabu ba'e ilivu diavona adi viaqa weaqidi, ta tua tuta qabuna iviaviaqidi. Ta wese nuanuadi mali tomotau ilivu diavona ina viaqidi 'inega ivonedia, "Ei emavo, omi'a wese ba'e yani diavona ona viaqidi!"

2

Yaubada ena luvine ilivu luveifadi weaqidi

¹ * Nage ona vonaya, "Ba'e tomotau diavona luveifa otaqidi!" Ta yavonemi omi'a me Diu wese emi luveifana taudi 'idewana, 'inega ge taha toga 'imiega navonaya, "Ya'a ba'e ilivu diavona ge eda alamania vonigo luveifadi." 'Inega tuta nana ovonaya vonigo mali qabu toluveifadi luaqiaqiedi be luvematasabu qiduana ina lobe a Yaubada 'inega, e 'inega omi'a 'idewani taumiega ami luvematasabu Yaubada 'inega oveve'ifoqeyea 'imia, mana omi'a wese ba'e yani diavona oviaviaqidi. ² Ni'a kahalamani aqiaqiea vonigo Yaubada ena luvine tunutunuqina 'inega ba'e ilivu diavona adi toviaqayavo naluvematasabudi. ³ Nage

* **2:1:** Md 7:1-2; Ion 8:7

omi'a onuaia be vonigo Yaubada mali tomotau edi ilivu luveifana weaqina naluvematasabudi, ta omi'a gebu, waisa? ⁴ * Ana 'ita nawale nuami ge da'eqa'uya Yaubada ena nuakolokolo be ena bibitaqo qiduana 'imia weaqina, waisa? Nage ge oda alamania ba'e nuakolokolo nana 'inega nuanuana ona nuagivila emi ilivu luveifana 'idiega, be 'inega na'etoyavuimi.

⁵⁻⁶ * Ta omi'a emi vedeba 'i'wana 'inega ge nuanuami be ona nuagivila. 'Inega taumiega ami luvematasabu qiduana weaqina oluluveagea. Mana nawale luvine ana 'aubena qiduana 'inaya Yaubada tauna bwa'obwa'o ana Toluvine "tomotau qabuda naluvineda eda viaqayavo 'idiega". ⁷ Vaidi tomotau tuta qabuna ilivu aqiaqidi iviaviaqidi, ta ivetafe'wa waiwai, mana nuanuadi 'amayaba be awatubo ina lobeia Yaubada 'inega. Ta wese yawai vataya isalisalia. E ba'e tomotau diavona nawale 'aubena nana 'inaya Yaubada toa vataya naneidi.

⁸ * Ta wese vaidi tomotau tuta qabuna taudiega weaqidi inuanua. Taudi Yaubada ena ilivu tunutunuqina ana 'eda inogenogea ta tuta qabuna ilivu luveifadi iviaviaqidi. E ba'e tomotau diavona nawale Yaubada ena gamosoala qiduana 'inega naluvematasabudi. ⁹ 'Inega toluveifa diavona visiqa ta wese veilage qiduana ina lobeia. Vonahaqiaqi, ba'e luvematasabu diavona ina madu'ifoqe me Diu 'idia, ta wese taudi mali qabu 'idia. ¹⁰ Ta ilivu aqiaqidi adi toviaqayavo

* **2:4:** Efe 1:7; 2Fit 3:15 * **2:5-6:** Same 62:12; Vos 24:12; Md 16:27; 2Kol 5:10 * **2:8:** 2Te 1:8

'amayaba be awatubo ta wese nuadaumwala ina lobeja Yaubada 'inega. Vonahaqiaqi, ve'ia aqiaqi otaqina ba'e namadu'ifoqe me Diu 'idia, ta wese taudi mali qabu 'idia, ¹¹ mana Yaubada tomotau qabudi luvine 'aideganega naluvinedi edi viaqayavo aqiaqidi be luveifadi 'idiega. Vonahaqiaqi, luvine 'aideganega tomotau 'ena'ena'idi be wese tomotau kavokavovo naluvinedi.

¹² Vonahaqiaqi, Yaubada me Diu naluvematasabudi mana Mosese ena luvine 'eno'eno 'idia, ta tua ilivu luveifana iviaviaqidi. Ta taudi mali qabu luvine nana ge da'eno'eno 'idia wese naluvematasabudi, mana ilivu luveifana iviaviaqidi. ¹³ Yaubada ana fata ba'e yani diavona naviaqia tomotau 'idia, mana ge taha toga ana fata navetunutunuqa Yaubada matanaya luvine ana noqola 'inega. Ta 'esi tomeqabu luvine nana ivelumamatayagea, e taudi Yaubada nahawatunutunuqedi. ¹⁴ * Vonahaqiaqi, Yaubada ena luvine ge da'eno'eno taudi ge me Diu 'idia, ta tua taudi wese luvine nana imatamatayagea, mana tomotau adi viaqa 'unu 'inega Yaubada nuanua aqiaqina a'uya nuadia, 'inega ni'a ialamani aqiaqiea tola'ai aqiaqina be tola'ai luveifana. ¹⁵ Ta edi viaqayavo 'idiega ive'itayea vonigo Yaubada ena luvine ana 'abiboda weaqina nuadia 'eno'eno, mana viaqa diavona 'idiega adi fata edi nuanua 'inega ve'ewa ina lutonovia ta wese 'awahaqiaqi ina lutonovia. ¹⁶ 'Inega kana alamani aqiaqiea, ba'e yani nana nawale na'ifoqe luvine qiduana ana 'aubena

* **2:14:** Via 10:35

'inaya, ta 'aubena nana 'inaya Yaubada Natuna Ieisu Keliso luvine be waiwai naneia, 'inega tomotau qabuda eda viaqayavo 'wai'waividi weaqidi naluvineda. 'Inega ba'e valena aqiaqina 'iguyega ona noqola aqiaqiea.

Me Diu ta Yaubada ena luvine weaqina

¹⁷ Wese taha yani weaqina nuanuagu ena 'wayavia 'imia. Taumiega ovonaya, "Ima'a me Diu." Ta Mosese ena Luvine 'inaya otunutunuvahala ami 'etoyavua weaqina, ta ovonaya vonigo ni'a oveiaiana Yaubada maega. Ta wese ovona vane vonigo yani qabuna aqiaqi otaqina omi'a ta Yaubada nuanimia. ¹⁸ Vonahaqiaqi, omi'a ovonaya be Yaubada ena nuanua ni'au oda alamaniana, ta wese ovonaya vonigo omi'a tola'ai aqiaqina be tola'ai lueifana ni'au oalamaniana, mana omi'a Yaubada ena luvine tubumiavo ni'au ive'itemi. ¹⁹ Ta wese taumiega ovonaya vonigo omi'a ami fata otaqa taudi mali qabu ona vanugwetedi be 'inega Yaubada ena nuanua ina alamaniana. Ta wese ovonaya vonigo omi'a ami fata Yaubada ena 'eda simasimatalina ona ve'itayea totoa velovelovana 'idia. ²⁰ * Omi'a ovonaya vonigo taudi mali qabu Yaubada ena nuanuayavo ge ida alamanidi ta ami fata ona vebibinidi, ta wese ovonaya vonigo taudi mali qabu kavona gogama ge taha edi alamanimo, 'inega nuanuami ona ve'itedi Yaubada weaqina. Emi vona diavona adi 'iu ba'e 'idewani, mana omi'a taumiega onuaia vonigo Yaubada ena luvine ana alamani be ana aqiaqi qabuna ni'a oalamani aqiaqiea.

* **2:20:** 2Tim 3:5

21 * Vonahaqiaqi, omi'a taudi mali qabu oveve'itedi Yaubada ena luvine weaqina, ta tola'ai weaqina taumiega ge oda ve'itemi? Ta emi lugaihi 'inaya ovonedi ovonaya, "Ge ona vanawala!" Ta tola'ai weaqina omi'a wese ovanavanawala? 22 Ta wese ovonedia, "Ge ona luabu!" Ta tola'ai weaqina omi'a taumiega luabu ilivuna oviaviaqia, waisa? Omi'a ovonedia, "Ge ona iwa'odu tokwalui 'idia!" Ta tola'ai weaqina omi'a mali qabu edi vanue tafwalolo 'idia olugulugu ta vanue nana ana 'ebeiwa'oduyavo ovanavanawalidi ta ovevegimwaneyedi? 23 Omi'a ogagasa wawasai Yaubada ena luvine ana alamani weaqina. 'Inega tola'ai weaqina omi'a Yaubada ge oda 'amayabea, ta 'esi luvine diavona oqeueunidi?

24 * 'Inegana Buki Nugwenugweina vonaya, "Taudi mali qabu Yaubada ana wawa i'awaluveifea omi'a me Diu emi ilivu lueifana weaqina."

25 Ta wese nuanuagu ba'itagana 'wafi ana da'a yavula weaqina ena vonemi. Omi'a me Diu 'oloto luvine ni'a o'ewea 'wafi ana da'a yavula weaqina. Ba'e da'a nana taha 'ebe'ita vonigo omi'a Yaubada ena tomotauyavo. Ta luvine nana ge taha ana aqiaqimo 'eguma Yaubada ena luvine qabudi oqeueunidi. Mana 'eguma luvine diavona ge ona matayagedi, e 'inega omi'a kavonaya 'wafimi ge ana da'a yavulamo. 26 * Ta 'eguma taudi mali qabu 'wafidi ge ana da'a yavulamo, ta vonahaqiaqi taudi Yaubada ena luvine qabuna imata-

* 2:21: Md 23:3-4 * 2:24: Ais 52:5; Isi 36:22 * 2:26: Gal 5:6

matayagedi, e taudi kavona be 'wafidi ida veda'a ta Yaubada ni'a 'awanatunedi. ²⁷ Vonahaqiaqi, taudi mali qabu 'wafidi ge ana da'amo ta Yaubada ena luvine qabuna i'abi'abibodedi, e taudi nu-akolokolo qiduana ina lobeia Yaubada 'inega, ta 'abiboda omi'a me Diu veveda'ami, mana Yaubada ena luvine oalamani aqiaqiedi ta ge oda matayagedi.

²⁸ Ge taha toga taunega navonaya, "Ya'a Diu aqiaqi, mana tamagu be inagu taudi me Diu, ta me Diu edi ilivuyavo yaviaviaqidi, ta wese ya'a 'wafigu da'ada'ana." ²⁹ * Vonahaqiaqi, taha to-motau ana fata taunega nagabea Diu tomotauna 'eguma ena nuanua qabuna ni'a vea'ugivilea Yaubada ana 'abiboda weaqina. Ta veda'a aqiaqi gebu 'wafi ana da'a yavula 'inega, ta 'esi giwali ena vevauvau Yaubada Niboanina ena viaqa 'inega. Ba'e tomotau diavona ge taha awatubo tomotau 'idiega ina lobei, ta 'esi Yaubada 'inega.

3

Yaubada ena vona fofofola qabudi nagive'ifoqeyedi

¹ 'Inega nage vaina 'imiega ona vonaya, "Eguma 'wafi ana da'a 'inega ge ama fata ana veaqiaqi Yaubada matanaya, e 'inega ima'a me Diu tola'ai ema aqiaqi Yaubada matanaya? Nage ima'a me Diu ema ilivu ge taha ana aqiaqimo?" ² Ta yavona aqiaqiemi, ita'a me Diu yani qiduana Yaubada matanaya, mana ena vona qabudi maduneida.

* **2:29:** Luve 30:6; Kol 2:11

³ Vonahaqiaqi, vaina me Diu edi vona fofofolayavo Yaubada 'inaya iqeunidi. Ta edi qeu nana 'inega nage ana fata Yaubada wese ena vona fofofola naqeunidi? ⁴ * Ge wese ana fata! Tomotau qabuda bwa'obwa'oya tovemeahaqila, ta Yaubada tauna Tovonahaqiaqi. 'Idewani Buki Nugwenugweina vonaya, "Yaubada ena vona qabudi vonahaqiaqi, ta ana tove'ewayavo navewaiwai va'inedi ena vona 'inega."

⁵ Ta vaina tomotau ivonaya, "Ema ilivu luveifana ma ana aqiaqi, mana Yaubada 'idiega nahawayavuima be 'inega tomotau ena nuakolokolo ina 'itea. E ba'e 'inega Yaubada ge ana luaqiaqi be naluvematasabuma." (Vonahaqiaqi, ba'e 'idewani vaidi tomotau ivona 'aiqa.) ⁶ Ta yavonevonemi, ge taha toga ba'e 'idewani navona 'aiqa! Mana Yaubada tauna Toluvine tunutunuqina, 'inega ana fata be nawale tomotau qabuda naluvineda. ⁷ Nage wese taha toga navonaya, "Yaubada ge daluaqiaqiea be naluvematasabugu egu u'ava 'inega, mana u'ava nana 'inega tomotau ena luvine tunutunuqina ina 'itea ta ina awatuboya." ⁸ Ta 'eguma ba'e vona diavona ona 'awahaqiaqiedi, e 'inega wese ona vonaya, "Ilivu luveifana ana viaqa 'evi'evivi yani aqiaqi otaqina!" Ta yavona aqiaqiemi, tomeqabu ba'e 'idewani ivonavona 'aiqa luaqiaqiedi be luvematasabu qiduana ina lobe! Ta vaidi tomotau iveve'ewegu ta ivonaya vonigo ya'a egu lugaihi omo'e 'idewani.

* **3:4:** Same 51:4

Ta edi ve'ewa 'inega luaqiaqiedi be Yaubada naluvematasabu aqiaqiedi.

Ge taha toga aqiaqina

⁹* 'Inega ma'oda, nage ita'a me Diu aqiaqida, ta 'abiboda mali qabu? Gebu'e otaqa! Mana ni'a yave'itemi tomotau qabuda me Diu ta wese mali qabu luveluveifada. ¹⁰* 'Idewani Buki Nugwenugweina vonaya,

“Ge taha tomotau tunutunuqina
Yaubada matanaya,
vonahaqiaqi ge taha toga.

¹¹ Ge taha toga
nuana da'eqa'u aqiaqiei
Yaubada ena nuanua weaqina,
ta wese ge taha toga dasalisalia
Yaubada ana veiana weaqina.

¹² Tomotau qabuda Yaubada kanogea,
ta ni'a katauya gei.
Ge taha toga yani aqiaqina daviaqia,
ge taha toga.”

¹³* “Edi vona qabuna luveifa otaqina,
kavona 'uluma meilana
davidivilia deba'unuyega.”

“Ta meadi u'ava 'avana,
'inega edi vona 'idiega
tomotau iveveilaeqeyedi
kavona be mwata veifana
tomotau edi 'ebeveilaeq.”

¹⁴* “Awadiega vona ve'alata
be wese vona badabadana

* **3:9:** Lom 1:18-2:24; 3:23 * **3:10:** Same 14:1-3; 53:1-3; Tolug
7:20 * **3:13:** Same 5:9; 140:3 * **3:14:** Same 10:7

tuta qabuna 'ifo'ifoqe.”

15* “Nuanuadi qiduana tuta qabuna tomotau ina luve'aligidi.

16 Ta ma'inaya itautauya giveluveifa be wese toa vitana iveve'ifoqeyea tomotau 'idia.

17 Ta toadaumwala ana ilivu tomotau maega ge ida alamania.”

18* “Ta Yaubada ana 'amayaba ge taha 'idia da'eno'eno.”

19 Vonahaqiaqi, Mosese ena luvine mai ita'a me Diu 'idaya, 'inega luaqiaqieda be luvine dina kana 'abibodedi. Mana luvine diavona 'iudi vonigo ge taha toga ana fata be ena ilivu luveifana navegeqedi Yaubada matanaya, ta wese luvine diavona 'idiega tomotau qabuda Yaubada naluvineda. 20* Ge taha toga ana fata navetunutunuqa Yaubada matanaya luvine ana matayaga 'inega. Mana 'eguma luvine diavona kana alamani aqiaqiedi, e 'inega wese ni'a kahalamania tuta qabuna kaqeuqeunidi.

Keliso ada luvematasabu 'avalea

21 Vonahaqiaqi, ge taha toga ana fata navetunutunuqa Yaubada matanaya Mosese ena luvine ana 'abiboda 'inega. Ta 'esi ba'itagana Yaubada 'eda vauvauna ni'a ve'iteda eda vetunutunuqa weaqina. E ba'e 'eda nana weaqina lova Buki Nugwenugweina 'inaya Yaubada ena tovesimasimana isimana 'ifoqeyea. 22* Ta 'eda nana ana alamani ba'e: Kana vetunutunuqa

* 3:15: Ais 59:7-8 * 3:18: Same 36:1 * 3:20: Same 143:2;

Lom 7:7; Gal 2:16 * 3:22: Gal 2:16

Yaubada matanaya 'eguma Ieisu Keliso kana vetumaqanea be tauna ana fata eda luveifana qabuna na'ewa yavuledi. Yaubada ge da'ita'ita eda viaqayavo 'idia, nage ita'a tomeqabu, ta 'esi tomotau qabuda ada fata be 'etoyavua kana lobeia Ieisu ana 'aidega 'inega.

²³ Tomotau qabuda ni'a kaluveifa otaqa, ta ge taha toga 'idega Yaubada ena aqiaqi otaqa ana 'etofwafwa dalobei. ²⁴ * Vonahaqiaqi, eda luveifana qabudi 'idiega Yaubada ni'a awayavuida, mana tauna Tonuakolokolo, 'inega ge dahawafeleda luvematasabu 'inaya. Ta 'esi Ieisu Keliso ena viaqa 'inega 'etoyavuida, mana Ieisu nana eda luveifana qabuna ni'a 'ewa yavuledi. ²⁵⁻²⁶ Vonahaqiaqi, Yaubada Ieisu vetunei mai 'idaya eda luveifana sabi 'avalana. Ta ba'e 'inega Yaubada ena gamosoala tomotau eda ilivu luveifana weaqina givelua'uya. 'Eguma kana vetumaqanea Ieisu sulalina ena inoqa 'inega yawaina vegubayea weaqida, e 'inega kana vetunutunuqa Yaubada matanaya. Lova Yaubada ena bibitaqo 'inega tomotau edi ilivu luveifana weaqina ge daluvematasabudi, ta ba'e 'itagana ena luvine tunutunuqina 'inega tomotau eda luveifana ge naveyani kavokavovoyei lova 'idewani. 'Inega Natuna vetunei mai eda luveifana sabi 'avalana, ta tomeqabu Ieisu ni'a ivetumaqanea, e wese Yaubada 'awatunutunuqedi.

²⁷ 'Inega nage ita'a ada fata be taudega kana vonavane ada 'etoyavua ana 'ewa weaqina?

* **3:24:** Lom 5:1

Gebu'e otaqa! Mana 'etoyavua nana ge kana lobei ita'a eda viaqa aqiaqidi 'idiega, ta 'esi eda vetumaqana Iesu 'inaya 'inega. ²⁸ E 'inega ni'a kavetunutunuqa Yaubada matanaya eda vetumaqana 'inega, ta gebu luvine adi 'abiboda 'inega, mana ge taha toga ana fata luvine qabudi na'abiboda aqiaqiedi.

²⁹ * Ana 'ita nage ge oda alamania Yaubada ge ita'a me Diu ada 'aidega eda Yaubada, ta 'esi taudi mali qabu wese edi Yaubada. ³⁰ * Vonahaqiaqi, Yaubada ana 'aidega otaqa, ta wese 'eda 'aidega otaqina 'inega na'awahaqiaqieda. Yaubada taunega tomotau qabuda ita'a me Diu ta wese taudi mali qabu gigivetunuqida matanaya eda vetumaqana Iesu 'inaya 'inega. ³¹ * Ta ma'oda, 'eguma vetumaqana Iesu 'inaya yani qiduana ada 'etoyavua weaqina, 'inega nage luvine adi 'abiboda kana veyani kavokavovoyedi? Gebu'e otaqa! Ta 'esi eda vetumaqana 'inega luvine qabuna ni'a kagive'ifoqe aqiaqiedi.

4

'Ebevetalatutula Ebelamo weaqina

¹ Egwavo, kana nuaia Ebelamo weaqina, tauna ita'a me Diu tubuda qiduana. Ta ma'oda 'inega Ebelamo vetunutunuqa 'aiqa Yaubada matanaya? ² Nage ena viaqa aqiaqidi 'idiega Yaubada 'awahaqiaqiea? Gebu! Mana 'eguma ena viaqayavo 'idiega davetunutunuqa Yaubada matanaya, e 'inega ana fata be davonavane

* **3:29:** Lom 10:12 * **3:30:** Luve 6:4; Gal 3:20 * **3:31:** Md 5:17

taunega weaqina. Ta Yaubada 'inaya ge davetunutunuqa ena viaqayavo 'idiega. ³* Buki Nugwenugweina vonaya, “Ebelamo Yaubada vetumaqanea, e ba'e 'inega Yaubada Ebelamo 'awahaqiaqiea 'inega vetunutunuqa matanaya.”
⁴ Tomeqabu ifewafewa edi mane ge nei kavovo 'inega ida 'ewedi, ta 'esi edi fewa 'inega ve'ia nana ilobeloba. ⁵ Ta yavona aqiaqiemi, ge taha toga ana fata ena fewa 'inega navetunutunuqa Yaubada matanaya, ta 'esi ena vetumaqana 'inega Yaubada na'awahaqiaqiea.

⁶ Lova kini Deibida ba'e yani diavona weaqina simana tuta nana toluveifadi me edi qaiawa ive-tunutunuqa Yaubada matanaya, ta toqaiawa dina ge taha yani aqiaqina ida viaqi, ta tua qaiawa nana ilobea, ⁷* 'inega Deibida weaqidi 'wayavia von-aya,

“Tomeqabu edi luveifana
 Yaubada ni'a nuataqoya,
 ana fata ina qaiawa qiduana,
 mana edi luveifana
 ni'a awala matanega.

⁸ Vonahaqiaqi,
 'ebeqaiawa qiduana
 tomeqabu edi luveifana weaqina
 ge taha ve'ewa ina lobei
 eda Kaiwabu 'inega.”

⁹ 'Inega ma'oda, nage Yaubada ena veyoluba ba'e ita'a me Diu damo weaqida, nage mali qabu wese weaqidi? Vonahaqiaqi, veyoluba nana ge me Diu damo weaqida, ta 'esi wese mali

* **4:3:** Nug 15:6; Gal 3:6 * **4:7:** Same 32:1-2

tomotau maega weaqida. Kana nuaia Ebelamo weaqina, mana ni'a yavonemi Yaubada Ebelamo 'awatunutunuqea ena vetumaqana weaqina. ¹⁰ Ta wese kana nuaia ai tuta 'inaya Yaubada Ebelamo 'awatunutunuqea. Nage Ebelamo nugweta 'wafina ida'a yavulea, ta 'abibodanaya Yaubada 'awatunutunuqea, nage Yaubada madu'awatunutunuqea, ta 'abiboda Ebelamo 'wafi ana da'a lobeaa? Egu vetala'ai ana alamani ba'e: Yaubada Ebelamo madu'awahaqiaqiea, ta 'abibodanaya 'wafi ana da'a 'ewea.

¹¹ * Ebelamo 'abiboda 'inaya 'wafi ana da'a na'ewea, ta nugweta luvine Yaubada 'inega 'ewea da'a nana weaqina ta vetumaqanea. Ta vetumaqana nana 'inega Yaubada Ebelamo madu'awatunutunuqea, ta 'abiboda Ebelamo ilivu nana viaqia. 'Inega Ebelamo da'a nana 'ewea kavona 'ebe'ita taha Yaubada 'inega ena vetumaqana weaqina. 'Inega Ebelamo tauna tovetumaqanayavo ge adi da'amo tamadi. Mana taudi wese edi vetumaqana 'inega ni'a ivetunutunuqa Yaubada matanaya, ta ge 'wafi ana luda'a 'inega. ¹² Ta wese Ebelamo taudi 'wafidi da'ada'ana tamadi. Ta ge adi fata be taudiega ina gabedi tunutunuqidi 'eguma edi vetumaqana ge davelelelea Ebelamo ena vetumaqana 'idewani, mana Ebelamo Yaubada madu vetumaqanea ta 'abibodanaya veda'a 'ewea.

Yaubada ena vona fofofola kana 'ewedi vetumaqana 'inega

* **4:11:** Nug 17:10-11

13 * Vonahaqiaqi, Yaubada Ebelamo tubunavo maega vona fofofolayedi taudi bwa'obwa'o qabuna naneidi ina 'abiluvinea. Ta ba'e vona fofofola nana Ebelamo ge da'ewei ena matayaga Mosese ena luvine 'inega, mana omo'e tuta nana 'inaya Mosese ena luvine nawale ge da'ifoqe Yaubada 'inega, ta 'esi 'ewea mana Yaubada Ebelamo 'awatunutunuqea ena vetumaqana 'inega. 14 * 'Inega 'eguma ovonaya vonigo Yaubada ena vona fofofolayavo taudi luvine ana tomatayaga weaqidi, ta wese onuaia vonigo taudi ni'a ivetunutunuqa Yaubada matanaya weaqidi. E 'inega ana 'ita kavonaya be vetumaqana yani kavokavovo 'imia, ta wese Yaubada ena vona fofofolayavo ge ana aqiaqimo. 15 * Ta ona nuave'avinia, tomeqabu itovotovoi be nuanuadi luvine ina 'abibodedi edi veaqiaqi Yaubada matanaya weaqina, e taudi luvematasabu ina lobe. Mana 'eguma luvine 'eno'eno, e 'inega wese luvine ana toqeu itoatoa.

16 * 'Inega o'itei, ge taha vona fofofola Yaubada 'inega da'ifoqe luvine ana 'abiboda 'inega, ta 'esi vetumaqana namo 'inega. Yaubada ena vona fofofola neida ena nei kavovo 'inega. 'Inega ge taha tola'ai 'eguma ita'a me Diu eda ilivu kana 'abibodedi nage gebu. Ta 'eguma eda vetumaqana Ebelamo ena vetumaqana 'idewani, e 'inega Yaubada ena vona fofofola kana 'ewa aqiaqiea. Mana Ebelamo tauna tovetumaqana qabudi tamadi. 17 * Ta ba'e

* 4:13: Nug 17:4-6; 22:17-18; Gal 3:29 * 4:14: Gal 3:18 * 4:15:

Lom 3:20; 5:13 * 4:16: Gal 3:7 * 4:17: Nug 17:5

yani nana weaqina Buki Nugwenugweina 'inaya simana tuta nana Yaubada Ebelamo vonea vonaya, "Ya'a yavenua'ivineu be una vetama bwa'obwa'o qabuna 'inaya bona taha taha ana tovonayavo weaqidi." Ba'e vona nana vonayea, mana Ebelamo Yaubada vetumaqanea tauna ana fata to'aliga nagiveyawaha 'eviviedi, ta wese vetumaqanea be ana fata vaina yani nawale ge ida 'ifoqe naveqaeyedi kavonaya be ni'a ida 'ifoqe.

18 * Vonahaqiaqi, Ebelamo ni'a vekofekofe 'inega ena nuanua venatuna weaqina ni'a dawalili. Ta tuta nana Yaubada Ebelamo vona fofofolea be navetama tomotau qabudi weaqidi, e 'inega Ebelamo Yaubada vetumaqanea. Ta wese Yaubada voneaya, "Eu gadeyavo ina ve'eala kavonaya be 'wadi'wadima mahalaya 'idewani."

19 * Vonahaqiaqi, Ebelamo ni'a vekofekofe otaqa ta ena waiwai gumwala, mana ya'wala anidedi (100) ni'a lobe. Ta wese moqanena Sela ni'a igagala. Ta tua, Ebelamo ena vetumaqana Yaubada 'inaya ge dadawalili.

20 Ta wese Ebelamo ge davenuana magilafu Yaubada ena vona fofofola 'inaya weaqina, ta 'esi ena vetumaqana vewaiwai otaqa. 'Inega Ebelamo Yaubada awatuboya vona fofofola nana weaqina.

21 'Inega Ebelamo taunega vonaya, "Yahalamani aqiaqiea, 'eguma Yaubada taha yani weaqina navona fofofolayea, e 'inega ana fata otaqa be yani nana naviaqia." 22 * Ta Ebelamo ena vetumaqana weaqina Yaubada 'awahaqiaqiea be 'inega vetunutunuqa matanaya.

* 4:18: Nug 15:5 * 4:19: Nug 17:17 * 4:22: Nug 15:6

²³ Ta ba'e vetunutunuqa nana ge Ebelamo ana 'aidega ana fata be nalobei, ²⁴ ta 'esi ita'a wese 'eguma Yaubada kana vetumaqanea tauna Ieisu Keliso eda Kaiwabu giveya'itotoya 'aligega, e 'inega Yaubada na'awatunutunuqeda. ²⁵ * Ieisu taunega awafelea 'aliga 'inaya ita'a eda luveifana adi nuataqo weaqina, ta 'abibodanaya Yaubada giveya'itoto 'eviviea 'aligega, mana nuanuana nave'iteda Natuna ena 'aliga 'inega ana fata be eda luveifana qabuna na'ewa yavuledi. Ta ba'e 'inega Yaubada ana fata na'awatunutunuqeda.

5

Vetumaqana vuaqina qaiawa

¹ Vonahaqiaqi, ni'a kahalamania vonigo Yaubada 'awatunutunuqeda eda vetumaqana 'inaya weaqina, 'inega toadaumwala aqiaqi otaqina ni'a kaloba 'eviviea tauna maega eda Kaiwabu Ieisu Keliso ena viaqa 'inega. ² Eda vetumaqana 'inega Ieisu mieda Yaubada ena nuakolokolo qidua va'inena 'inaya. Ta ba'itagana ba'e nuakolokolo nana ni'a kalulutonovia eda toa 'inaya. 'Inega luaqiaqieda be me eda qaiawa kana lu'ita vane eda toa weaqina Yaubada aqiaqi otaqina maega, mana tuta maimai 'inaya ena aqiaqi nana gamonaya kana toa.

³ * Ta wese ana fata be kana qaiawa tuta nana vita kana lobedi eda vetumaqana Ieisu 'inaya weaqina. Ba'e vita diavona yani aqiaqina weaqida, mana 'idiega bibitaqo ana ilivu kana alamani aqiaqiea. ⁴ Ta bibitaqo nana ana ilivu

* **4:25:** Ais 53:4-5 * **5:3:** Iem 1:2-3; 1Fit 1:5-7

'inega eda vetumaqana ge nadawalili ta 'esi kana tovoloi'ita. Ta tovoloi'ita nana eda lu'ita vane ada 'etoyavua weaqina nagivewaiwaiea, ta ba'e 'inega Yaubada na'awahaqiaqieda. ⁵ Ta ba'e lu'ita vane nana ge wese ana fata nagivenuaviteda, mana Yaubada ena veyoluba qiduana 'idaya ni'a kahalamani aqiaqiea Niboana Gwalagwalana 'inega. Mana tuta nana Niboanina Gwalagwalana neida 'inega nuada 'eqa'uya ena veyoluba qidua va'inena 'idaya weaqina.

⁶ Lova yoqoyoqonida katoatoa be ge ada iulamo eda luveifana weaqina. Ta ba'e tuta nana 'inaya Keliso 'ifoqe mai ta ita'a toluveifada weaqida 'aliga. ⁷ Ge taha toga nuanuana be yawaina nahawafelei ta na'aliga taha tomotau aqiaqina weaqina. Ta ana fata taha toga nuanuana yawaina nahawafelei be na'aliga taha tomotau aqiaqi otaqina weaqina. ⁸ * Ta 'esi Yaubada ena veyoluba qiduana ve'iteda mana Natuna Keliso vetunei mai 'aliga weaqida tuta nana ita'a nawale luveifada katoatoa.

⁹ * Ta ita'a ni'a kavetunutunuqa Yaubada matanaya Keliso sulalinea, 'inega kahalamani aqiaqiea nawale na'etoyavuida Yaubada ena luvematasabu 'inega! ¹⁰ Lova ita'a Yaubada kavevoalanea eda luveifana 'inega. Ta Natuna ena 'aliga 'inega veiana 'evivieda. 'Inega kahalamani aqiaqiea nawale na'etoyavuida luvematasabu vataya 'inega, mana mayawaina toatoa. ¹¹ 'Inega ba'itagana kana qaiawa qiduana eda veiaiana aqiaqina be vauvauna Yaubada

* **5:8:** Ion 3:16; 1Ion 4:10 * **5:9:** Lom 1:18; 2:5; Efe 2:3-5

maega weaƣina, mana eda Kaiwabu Ieisu Keliso ena viaƣa ƣabuna 'idiega ni'a kaveiaiana aƣiaƣi Yaubada maega.

Adama ena viaƣa ta wese Keliso ena viaƣa

12 * Tuta nana Adama luveifana maduviaƣia, 'inega 'abibodanaya ba'e luveifa nana wese vauka-mana tomotau ƣabudi 'idia. Ta luveifa nana 'inega wese 'aliga 'ifoƣe 'idia, mana tomotau ƣabudi ni'a iluveifa. 13-14 * Lova Adama ena tuta 'inaya Yaubada luvine neia 'aiwe 'aidegana vuaƣina ge na'aini, ta Adama luvine nana bwegea. Ta tuta nana 'inaya Yaubada ge taha wese luvine daha'ui tomotau 'idia, 'inega ge taha luvine ida bwegei 'idewani Adama. Ta tua taudi wese i'aliga 'ovoa, mana luveifana iviaƣidi, 'inega ge adi fata be 'aliga 'inega ina dena. Tuta kuena 'abibodanaya Ieisu Keliso mai bwa'obwa'oya, 'inega 'eguma Adama be Keliso edi viaƣayavo kana giveleleƣedi ta kana 'itedi ge wese ida ve'aidega.

15 'Oloto 'aidegana tauna Adama ena luveifana 'inega 'aliga miea tomotau ƣabudi 'idia, ta wese 'oloto 'aidegana tauna Ieisu Keliso nuataƣo miea Tamana Yaubada ena nuakolokolo ƣiduana 'inega. 'Inega 'eguma kana 'itea ita'a eda luveifana ta Yaubada ena veyoluba ƣiduana 'idaya ge ida velelelea. 16 Vonahaƣiaƣi, Yaubada ena veyoluba be Adama ena luveifana vuaƣidi ge ida ve'aidega. Mana Adama ena luveifana vuaƣina 'inega tomotau ƣabuda 'aliga visiƣina kana lutonovia,

* 5:12: Nug 3:6; Lom 6:23 * 5:13-14: Lom 4:15

ta Yaubada ena veyoluba qiduana 'inega ana fata na'awatunutunuqeda. Vonahaqiaqi, eda luveifana qiduana 'inega luaqiaqieda be luvematasabu agona kada lobe, ta veyoluba nana 'inega ni'a yavuida. ¹⁷ Ta ba'e Adama nana ena luveifana 'inega 'aliga ena waiwai 'ifoqe tomotau 'idaya ta luvineda, ta ge taha toga ana fata 'aliga nana 'inega nadena. Ta ba'itagana tomeqabu Yaubada ena nuakolokolo aqiaqi otaqina 'inega ni'a ivetunutunuqa matanaya, e taudi adi fata ilivu luveifana ta wese 'aliga ina vewaiwai va'inedi tomotau 'aidegana ena viaqa aqiaqina 'inega, e tauna ana wawa Iesu Keliso.

¹⁸ * Vonahaqiaqi, Adama ena luveifana 'aidegana 'inega luvematasabu miea tomotau qabuda 'idaya, ta Keliso ena viaqa 'aidegana aqiaqi otaqina 'inega Yaubada ana fata be tomotau qabuda na'awatunutunuqeda matanaya, ta wese ana fata viaqa nana 'inega yawai vataya kana 'ewea. ¹⁹ * Tomotau 'aidegana Yaubada ena luvine ge damatayagei 'inega tauna ena noga 'inega tomotau qabuda luveifana kafida. Ta wese taha 'oloto ena matayaga 'inega ana fata be tomotau qabuda kana vetunutunuqa Yaubada matanaya.

²⁰ Yaubada ena luvine tomotau neida be yaqisa nuada na'eqa'uya ta eda luveifana qiduana taudega kana 'ita lobe. Ta eda luveifana ge dalua'u, ta 'esi veve'ena'i. Ta tuta nana Yaubada eda luveifana 'itea veve'ena'i, e 'inega ena nuakolokolo weaqida wese ve'ena'i va'ine.

* **5:18:** 1Kol 15:22 * **5:19:** Ais 53:11

21 * Lova ilivu luveifana tomotau qabudi 'abiluvinedi miedi 'aliga 'inaya, ta ba'itagana Yaubada ena nuakolokolo aqiaqi otaqina 'abi'abiluvinedi. E ba'e nuakolokolo nana 'inega ni'a kavetunutuŋa Yaubada matanaya, ta vetunutuŋa nana 'inega yawai vataya kana lobeŋa eda Kaiwabu Ieisu Keliso 'inega.

6

Ieisu luveifana ena waiwai luveawalia

¹ Nage taha toga 'imiega navonaya, "Tuta qabuna luveifana kana viaviaqidi be yaqisa Yaubada ena nuataqo be wese ena nuakolokolo qiduana naneida." ² Ta yavona 'eviviami, gebu'e otaqa! Mana ita'a tovetumaqana eda nuanua luveifadi ni'a kanogedi, 'inega ge daluaqiaqieda be luveifa diavona kana viaqa 'eviviedi lova 'idewani. ³ * Nuanuagu ona alamania lova tuta nana kave'ale vetumaqana be kababitaŋo Ieisu Keliso 'inaya sabi ve'aidega maega, e 'inega wese kavonaya be kada 'aliga tauna maega. ⁴ * Mana babitaŋo nana 'inega kavona kada 'aliga be wese kavona taudega kada tavunida Keliso maega. Ta Tamana ena waiwai aqiaqi otaqina 'inega giveya'itoto 'eviviea 'aligega. 'Inega ita'a wese toa vauvauna 'inaya katoatoa. ⁵ Ieisu toa vauvauna lobeŋa Yaubada 'inega tuta nana 'aliga 'etoluai 'inaya, mana 'aliga nana 'abibodanaya Yaubada giveya'itoto 'eviviea. 'Inega ita'a wese nagiveya'itoto 'evivieda toa vauvauna 'inaya,

* 5:21: Lom 6:23 * 6:3: Gal 3:27 * 6:4: Kol 2:12

mana ni'a kave'aidega Ieisu maega ena 'aliga 'inega.

6 * Kana nuave'avinia tuta nana Ieisu itutuve'ewe'a 'etoluai 'inaya, e 'inega kavona ita'a wese eda ilivu nugwenugweina Yaubada tutuve'ewe'a Natuna maega be yaqisa eda nuanua luveifana ena waiwai nahawala 'idega. 'Inega ba'itagana ita'a yavuyavuida be luveifana ge wese ana fata naluvineda. 7 Mana ni'a kahalamania ilivu luveifana ge ana fata be tomotau 'ali'aligidi na'abiluvinedi. 'Inega ita'a yavuyavuida eda ilivu luveifana 'idiega, mana kavonaya be kada 'aliga Ieisu maega. 8 Ta 'eguma ni'a ka'aliga Keliso maega, e 'inega kavetumaqana aqiaqiea nawale mayawaida tauna maega toa vauvauna kana lobe'a. 9 Ba'e yani diavona kahalamani aqiaqiedi, mana Keliso ya'itoto 'evivi 'aligege, ta ge wese ana fata na'aliga 'evivi. Vonahaqiaqi, 'aliga ena waiwai ge wese ana fata be na'abiluvinei. 10 Keliso tuta 'aidegana 'aliga tomotau eda ilivu luveifana weaqidi. Ta 'aliga nana 'inega ilivu diavona vewaiwai va'inedi. Ta ba'e 'itagana mayawaina toatoa Tamana Yaubada ana awatubo sabi give'ena'ina. 11 * 'Inega omi'a wese taumi weaqimi ona nuanua kavonaya be ni'a oda 'aliga ilivu luveifana 'idiega, ta 'esi mayawaimi Yaubada maega otoatoa ana awatubo weaqina Ieisu Keliso ena viaqa 'inega.

12 * 'Inega ge ona awafelemi nuanua luveifana adi viaqa 'idia, mana 'eguma luveifa nana ona viaqia, e 'inega wese luveifa diavona ina

* 6:6: Gal 5:24 * 6:11: 2Kol 5:15; Gal 2:19 * 6:12: Nug 4:7

'abiluvinemi. Ta ona nuave'avinia 'wafimi nawale ina 'aliga, ta niboanimi ge ina 'aliga. ¹³ * Ge taha 'wafimi du'unavo ona awafeledi be ina vetoiula ilivu luveifana ana viaqayavo 'idia. Ta 'esi taumiega ona ve'ineiemi Yaubada 'inaya, mana yawai vauvauna ni'a neimi. 'Inega 'wafimi du'unavo qabudi ona awafeledi be ina vetofewa Yaubada 'inaya viaqa tunutunuqidi be aqiaqidi weaqidi. ¹⁴ * Vonahaqiaqi, omi'a ba'itagana luveifana ge da'abiluvinemi, mana omi'a ge luvine ena waiwai 'ayanaya oda toatoa ami 'etoyavua weaqina. Ta 'esi omi'a Yaubada ena nuakolokolo 'inega yavuyavuimi otoatoa.

Yaubada 'inaya kana vetofewa

¹⁵ Ni'a yave'itemi Yaubada ena nuakolokolo 'inega ni'a yavuida luvine ana 'abiboda 'inega. Ta nage taha toga 'imiega una vonaya, "Eguma Yaubada ni'a yavuida luvine ana 'abiboda 'inega, e 'inega nage ana fata be luveifana kana viaqa 'evi'eviviedi?" Ta yavona aqiaqiemi, gebu. Ge wese 'idewani ona nuanua 'aiqa! ¹⁶ * Ta 'esi nuanuagu ona alamani aqiaqiea 'eguma toyani nuanuami be ona 'abibodea, e 'inega yani nana navetovanugweta 'imia, waisa? 'Inega 'eguma luveifana ona matayagea, e 'inega Yaubada maega ge ana fata be ona toa vataya. Ta 'eguma Yaubada ona matayagea, e 'inega na'awahaqiaqiemi be ilivu tunutunuqina ana 'eda 'inaya ona tauya. ¹⁷ Ta yalulukaiwa qiduana Yaubada 'inaya, mana lova omi'a luveifana

* **6:13:** Lom 12:1 * **6:14:** 1Ion 3:6 * **6:16:** Ion 8:34; 2Fit 2:19

luvinemi, ta 'abibodanaya ve'ita aqiaqi otaqina Ieisu weaqina o'ewea, ta ve'ita nana emi nuanua qabuna 'inega o'awahaqiaqiea ta omatayagea. ¹⁸ Ta ba'e matayaga nana 'inega 'etoyavua ni'a olobea luveifana ena waiwai 'inega, ta ba'itagana ni'a ovetofewa emi Kaiwabu vauvauna weaqina, 'inega Yaubada ena ilivu tunutunuqina ana 'eda 'inaya otautauya.

¹⁹ Egu ve'ita ba'e yagigivesimatalia 'imia taudi tofewa be wese kaiwabu edi ilivu 'inega, mana ve'ita diavona adi alamani tufwana meaqana. Lova omi'a ilivu bwavubwavudi be wese luvine adi qeu 'idia taumiega oawafelemi ta ovetofewa weaqidi. Ta ba'itagana luaqiaqiembe be ilivu tunutunuqina ana Kaiwabu ona nuanua weaqina be ona vetofewa 'inaya, be yaqisa emi toa navevunavunaqa Yaubada matanaya.

²⁰ Vonahaqiaqi, lova ilivu luveifana ana kaiwabu 'inaya ovetofewa, ta omo'e tuta diavona 'idia ge wese oda nuanua ilivu aqiaqidi adi viaqa weaqidi. ²¹ Ta ba'e ilivu diavona adi ve'ia tola'ai? Vonahaqiaqi, adi ve'ia ge taha yani aqiaqina, waisa? 'Inega ba'itagana oiniyauyau ba'e ilivu diavona oviaqidi weaqidi, mana adi toviaqayavo luvematasabu vataya ina lobe. ²² Ta ba'itagana Yaubada ni'a 'etoyavuimi ilivu luveifana ena waiwai 'inega, e 'inega ni'a ovetofewa kavovo tauna weaqina. Ta wese ba'e 'itagana ilivu simasimatalina ana 'eda 'inaya otautauya ta oviaviaqidi, ta ba'e 'eda nana 'inega ni'a olugu Yaubada ena qabu 'idia ta ana ve'ia yawai vataya ona 'ewea. ²³ * Vonahaqiaqi, ilivu luveifana ana ve'ia toasi'i

* **6:23:** Lom 5:12,15

vataya Yaubada 'inega. Ta Yaubada ena nei kavovo 'inega yawai vataya kana 'eweā, mana ita'a ni'a kave'aidega eda Kaiwabu Ieisu Keliso maega.

7

Luvine ge wese ana fata nayoqonida

¹ Omi'a taigwavo be novugwavo, Mosese ena luvineavo ni'a oalamanidi, 'inega wese ni'a oalamaniana tomodaudi adi luaqiaqi be luvine ina matayagedi, mana luvine diavona tomodau mayawai dimo weaqidi, ta ge 'ali'aligidi weaqidi.

² Egu vona ba'ena ena givesimatalia 'imia, ona noqolia. Tuta nana taha vavine ina vaqi, e 'inega vaqi ana luvine nakafidi moqanedi maega, mana 'oloto nana mayawaina toatoa. Ta 'eguma 'oloto nana na'aliga, e 'inega vavine dina vaqi ana luvine 'idiega ni'a gumwala. ³ Ta 'eguma moqanedi nawale mayawaina toatoa, ta tua mali 'oloto maega ina vaqi, e 'inega vavine dina velamo'eno kavokavovo ilivuna iviaviaqia. Ta 'esi 'eguma moqanedi na'aliga, e 'inega taudi vaqi ana luvine 'inega na'eyavuidi, be adi fata mali 'oloto maega ina vaqi 'evivi. Ba'e vaqi nana ge velamo'eno kavokavovo ana ilivu 'idewani, mana moqanedi nugwenugweina ni'a 'aliga.

⁴* Taigwavo be novugwavo, egu vonayavo 'iudi ba'e: Omi'a wese 'idewani vavine dina. Mana omi'a kavonaya be ni'a oda 'aliga Keliso maega ana 'etoluai 'inaya, e 'inega Mosese ena luvine ena waiwai 'ayanaya ge oda toatoa, ta 'esi ni'a 'inega odena. Ta Yaubada Ieisu giveya'itoto

* 7:4: Lom 6:2,11

'eviviea 'aligege, 'inega ba'e 'itagana Ieisu maega ni'a ove'aidega, e 'inega yani qabuna aqiaqina Yaubada weaqina ami fata ona viaqidi. ⁵ Lova tauda eda nuenuaga katoa, 'inega eda nuanua luveifadi iluvineda, ta nuanua diavona 'idiega 'wafida kagivebwavudi. Ta Yaubada ena luvine eda nuanua sitonovidi 'inega nuanuada ilivu luveifadi kana viaqidi, e ba'e nuanua diavona 'idiega ve'ia luveifana kalobea, ta ve'ia nana ana alamani ba'e: Tuta vataya 'inaya kana toasi'i Yaubada 'inega. ⁶ * Ta ba'itagana yavuyavuida katoatoa luvine nana 'inega, mana ita'a kavonaya be kada 'aliga Keliso maega, 'inega luvine nana ena waiwai ge wese ana fata nakafida. 'Inega ba'itagana ada fata otaqa be kana vetofewa Yaubada weaqina. Ge lova 'idewani Mosese ena luvine 'waya'wayavina 'inega, ta 'esi 'eda vauvauna 'inega, ta ba'e 'eda nana Yaubada Niboanina 'inega mai.

Yaubada ena Luvine 'inega eda luveifana kahalamanidi

⁷ * Nage taha toga 'imiega navonaya, "Ma'oda, nage Mosese ena luvine yani luveifana?" Ta yavona aqiaqiemi, ge wese 'idewani ona nuanua 'aiqa! Mana luvine nana ge wese luveifana, ta 'esi luvine nana ve'itegu ilivu luveifana yani luveifa otaqina. Vonahaqiaqi, ge agu fata be egu luveifana eda alamania 'eguma ge taha luvine da'eno'eno. Ta Yaubada ena luvineavo i'eno'eno ta taha 'idiega vonaya, "Ge mali tomtau edi kulufa weaqina ona nuanua govaqa sabi

* **7:6:** Lom 8:2; 6:4 * **7:7:** 'Ifo 20:17; Luve 5:21

'ewana." E 'inega yahalamani aqiaqiea ilivu nana yani luveifana. ⁸ Ta tuta nana Yaubada ena luvine ve'itegu vonigo nuagovaqa ana ilivu yani luveifana, 'inega ge eda lua'u luveifa nana ana viaqa 'inega, ta 'esi egu nuanua qiduana be yani qabuna luveifana ena viaqidi. Ta 'eguma ge taha luvine da'eno'eno e 'inega luveifa nana ena waiwai ge ana fata be naluvetuvetunegu luveifana 'inaya.

⁹ Lova Yaubada ena luvine adi alamani weaqina nuagu ge da'eqa'ui, 'inega ge wese eda nuanua egu toa weaqina. Ta 'esi tuta nana luvine nana ana alamani ya'ewea e 'inega nuagu 'eqa'uya vonigo ya'a luvine nana ni'a yabwegea, ta Yaubada 'inega ni'a yatoasi'i. ¹⁰ Yaubada ena luvine aqiaqina 'iuna be namiegu yawai vataya 'inaya, ta ya'a egu luveifana 'inega luvine nana vetoasi'iegu Yaubada 'inega. ¹¹ * Tuta nana alamani ya'ewea Yaubada ena luvine taha weaqina vonaya, "Ge taha tomatu ena kulufa weaqina ona nuanua govaqa sabi 'ewana!" E 'inega egu nuanua luveifana vewaiwai ta u'vegu vonigo Yaubada ena luvineavo adi matayaga 'inega toa vataya ena lobe. Ta 'esi egu nuanua luveifana ana matayaga 'inega toasi'i vataya Yaubada 'inega yalobe.

¹² * Ta tua, Yaubada ena luvineavo nawale gwalagwaladi be tunutunuqidi ta wese aqiaqi otaqidi. ¹³ 'Inega ma'oda, nage luvine aqiaqina 'inega 'aliga ana luvine yalobe? Egwavo, ge wese 'idewani ona nuanua 'aiqa! Ta luveifana Yaubada ena luvine aqiaqina vefewea agu luve-matasabu sabi give'ifoqena. Ta ba'e 'inega lu-

* **7:11:** Nug 3:13 * **7:12:** 1Tim 1:8

veifana ena ilivu luveifa otaqina kana alamani aqiaqiea, mana Yaubada ena luvine aqiaqi otaqidi vefewedi ena viaqa luveifadi weaqina.

Eda vedavi luveifana maega

¹⁴ Ni'a kahalamania Mosese ena luvineavo Yaubada Niboanina 'inega mai yani aqiaqina. 'Inega luvine nana ge taha ena luveifamo, ta 'esi ya'a taugu 'iguya luveifana 'eno'eno. Mana luvine nana niboanida weaqina, ta ya'a tomotau kavokavovo 'ali'aligigu, 'inega luveifana 'abi'abiluvinegu kavona be egu kaiwabu. ¹⁵ * Vonahaqiaqi, egu viaqayavo yaviaviaqidi ge eda alamania tola'ai weaqina yaviaviaqidi. Mana 'eguma yani aqiaqina nuanuagu be ena viaqia e ba'e yani nana ge eda viaqia, ta 'esi toyani ge nuanuagu be ena viaqi, e ba'e yani nana yaviaviaqia. ¹⁶ Ni'a yahalamani aqiaqiea egu viaqayavo yani luveifadi. Mana tuta nana yaviaviaqidi, e 'inega 'abibodanaya agu lutonova ge aqiaqina Yaubada matanaya. 'Inega luvine diavona ya'awahaqiaqiedi yani aqiaqi otaqidi weaqigu, mana iveve'itegu ya'a luveifagu. ¹⁷ Ta ge agu fata be ya'a taugu egu nuenuaga ena 'abiluvinegu, mana luveifa nana giwaliguya 'eno'eno tauna vavanugwetegu 'inega ba'e luveifa diavona yaviaviaqidi.

¹⁸ Yahalamani aqiaqiea ge taha yani aqiaqina da'eno'eno taugu egu nuanua 'inaya, mana ya'a totoa bwa'obwa'o. Vonahaqiaqi, nuanuagu qid-uana yani aqiaqina ena viaqia, ta ge agu fata yani diavona ena give'ifoqeyedi be ena viaqidi.

* **7:15:** Gal 5:17

19 Mana nuanuagu be yani aqiaqina ena viaqia, ta ge eda viaqia. Ta wese yatohotoho waiwai be egu ilivu luveifana ena givelua'uya, ta ge agu fata, ta tua nawale yaviaviaqidi. 20 Ta 'eguma vaina yani ge nuanuagu be ena viaqidi, ta tua nawale yaviaviaqidi, e 'inega kavona ya'a ge eda viaqidi, ta 'esi luveifana 'iguya 'eno'eno luluvetuvetunegu 'inega yaviaviaqidi.

21 Ana 'ita kavona ya'a egu toa bwa'obwa'oya ana luvine ba'e 'idewani: 'Eguma nuanuagu be yani aqiaqina ena viaqia, 'inega luveifana givelua'ugu yani aqiaqidi adi viaqa 'inega, ta 'esi luveifana yaviaviaqia. 22 Ya'a egu nuenuaga ta wese giwaligu qabuna 'inega yaqaiqaiawa qid-uana Yaubada ena luvineavo weaqina. 23 * Ta yahalamani aqiaqiea wese taha waiwai fe-wafewa 'wafigu 'inaya, ta ba'e waiwai nana egu nuanua vevoalanea ta vewaiwai va'inea, 'inega yavetofewa kavovo luveifa nana 'iguya 'eno'eno weaqina. 24 Aioi! Vonahaqiaqi, ya'a ni'a yaluveifa otaqa! Nage togama ana fata be egu luveifana 'inega na'etoyavuigu? 25 * Ta kana lukaiwa Yaubada 'inaya, mana egu vetala'ai ana ve'ia ba'e: Iesu Keliso eda Kaiwabu 'inaya 'etoyavua kana lobe. Ya'a giwaligu qabuna 'inega nuanuagu qid-uana Yaubada ena luvine weaqina ena vetofewa, ta mana luveifana egu nuanua 'inaya 'eno'eno, 'inega luveifa nana vefewegu ena nuanua 'inaya.

8

Yawai aqiaqina Yaubada Niboanina 'inega

* 7:23: Gal 5:17; 1Fit 2:11 * 7:25: 1Kol 15:57

¹Yani qabuna ni'a yave'itemi eda vetunutunuqa Yaubada matanaya weaqina, 'inega ona alamani aqiaqiea tomeqabu ni'a ive'aidega Ieisu Keliso maega taudi ge wese luvematasabu ina lobei Yaubada 'inega. ²Ba'e vona nana vonahaqiaqi, mana Yaubada Niboanina ena waiwaiega toa vauvauna ni'a neida. Ta ba'e toa nana 'inega yavuida ilivu luveifadi adi viaqa 'idiega, e omo'e 'inega luveifana ena waiwai ge wese ana fata be nave-toasi'ieda Yaubada 'inega. ³Mosese ena luvineavo Yaubada 'inega ge adi fata be ina givelua'uda ilivu luveifana adi viaqa 'idiega. Ita'a ge ada fata be luvine diavona kana 'abibodedi, mana 'wafi ena nuanua ka'abibodedi 'inega ita'a dawalilida. Ta Yaubada ena nuenuega mali 'eda give'ifoqeyea ada 'etoyavua weaqina. 'Inega Natu Otaqina vetunei mai bwa'obwa'oya ta vetomotau ita'a 'idewani. Ta ita'a me eda luveifana, ta tauna ge taha ena luveifamo. 'Inega Yaubada Natuna vegubayea eda luveifana weaqina, ta ba'e 'inega luveifana ena vetoluvine 'idaya luveawalia.

⁴* Yaubada ba'e yani diavona viaqia be yaqisa ena nuanua ena luvine weaqina ana aqiaqi na'ifoqe. Ta ba'e yani nana na'ifoqe tomeqabu Yaubada Niboanina ena nuanua iviaviaqia 'idia, ta ge luveifana ana toviaqayavo 'idia. ⁵Tomeqabu viaqa luveifana 'abi'abiluvinedi taudi tuta qabuna yani luveifana weaqina inuanua, ta tomeqabu Niboana Gwalagwalana ni'a 'abi'abiluvinedi, e taudi tuta qabuna inuanua yani aqiaqina weaqina, ta ba'e 'inega Yaubada Niboanina igiveqaiawea. ⁶Ta 'eguma viaqa

* 8:4: Gal 5:16,25

luveluveifadi emi nuanua i'abi'abiluvinea, 'inega ge ami fata ona toa vataya Yaubada maega. Ta 'eguma Yaubada Niboanina 'abi'abiluvine, e 'inega ana ve'ia toadaumwala be wese yawai vataya Yaubada maega ona lobe. ⁷ Nuanuagu egu vona ena givesimatalia 'imia, mana tomotau edi viaqa luveifana 'idiega tuta qabuna Yaubada iveaviea, ta ge taha tuta ena luvine ida matayagea, ta wese tuta maimai 'idia ge ina matayagei. ⁸ Ba'e 'iuna 'inega tomeqabu taudi nawale viaqa luveifana ena luvine 'ayanaya itoatoa ge adi fata be Yaubada ina giveqaiawei.

⁹ * Ta omi'a ge oda toatoa viaqa luveifana ena 'abiluvine 'ayanaya. Vonahaqiaqi, omi'a Niboana ena 'abiluvine 'ayanaya otoatoa 'eguma Yaubada Niboanina ni'a o'ewea ta giwalimia 'eno'eno. 'Inega ona nuave'avinia 'eguma taha toga Keliso Niboanina 'inaya ge da'eno'eno, e 'inega tomotau nana ge wese Keliso ena tomotau. ¹⁰ * Vonahaqiaqi, nawale 'wafimi ina 'aliga emi luveifana 'inega. Ta 'eguma Keliso Niboanina 'imia toatoa 'inega niboanimi ge wese na'aliga, mana omi'a ni'a ovetunutunuqa Yaubada matanaya. ¹¹ Yaubada Niboanina Iesu giveya'itotoya 'aligea, ta ba'e Niboana nana 'imia toatoa. Vonahaqiaqi, 'wafimi yani 'ali'aligina, ta Yaubada ba'e Niboana nana 'inega 'wafimi nawale nagiveyawaha 'eviviedi 'idewani lova Keliso giveya'itotoya 'aligea.

¹² 'Inega taigwavo be novugwavo, omi'a ge ami luaqiaqi be tola'ai 'wafimi ena nuanua nakeiemi

* **8:9:** 1Kol 3:16; 12:3 * **8:10:** Gal 2:20

be ona viaqidi, ta 'esi Yaubada Niboanina ena nuanua ona viaviaqidi. ¹³* Mana 'eguma 'wafimi ena nuanua ona 'abibodea 'inega ona veilage vataya. Ta 'eguma Niboana Gwalagwalana ena waiwaiega 'wafimi ena nuauayavo luveifadi ona nogedi, e 'inega ona toa vataya Yaubada maega, ¹⁴ mana tomeqabu Yaubada Niboanina vavanugwetedi e taudi Yaubada natunavo.

¹⁵* * Omi'a Yaubada Niboanina ni'a o'ewea, ta ba'e Niboani nana ge ana fata nayoqona 'eviviemi kavona tofewa kavovo 'idewani, ta wese ge ana fata nagivemwaninivemi. Ta 'esi ba'e Niboani nana 'inega Yaubada ni'a fayayemi natunavo 'idewani, ta ena susu gamonaya otoatoa, 'inega ona voneaya, "Tamagu, o'a Tama otaqigu!" ¹⁶* Mana Yaubada Niboanina Gwalagwalana vonavona giwali otaqidaya vonahaqiaqi ita'a natunavo. ¹⁷ E 'inega yani qabuna 'eno'eno vatayadi 'inaya i'eno'eno kana 'ewedi, mana ita'a natunavo. 'Inega yani diavona Yaubada Keliso ni'a neia, e ita'a wese nawale naneida. Ta 'eguma nuauada yani qabuna aqiaqi otaqidi kana lobedi Yaubada 'inega, e 'inega nugweta wese Keliso ena veilage visiqina kana vebaea 'idewani tauna ni'a vebaea.

Tuta maimai ana aqiaqi otaqa kana 'itea

¹⁸ Ta ba'itagana visiqi diavona kavevebaedi ge kana giveleleqedi Yaubada ena aqiaqi otaqa maega, mana tuta maimai 'inaya Yaubada ena aqiaqi otaqa nave'ifoqeyea 'idaya, ta ba'e

* **8:13:** Gal 6:8; Kol 3:5 * **8:15:** 2Tim 1:7; Mk 14:36 * **8:15:**

Gal 4:5-7; Ve 21:7 * **8:16:** 2Kol 1:22

aqiaqi nana visiqa diavona veqidua va'inedi.
 19 Vonahaqiaqi, kuyavata qabuna me edi
 'iva'ava'ata iba'eba'e Yaubada ena simana 'ifoqe
 yani taha weaqina, mana ba'e simana nana 'inega
 ina alamani aqiaqiea tomeqabu Yaubada natu
 otaqinavo. 20-21 * Mana kuyavata qabudi Yaubada
 ena nuanua ana 'etofwafwa weaqidi ge ida lobei
 'inega iveyani kavokavovo. Ta ge taudiege edi
 nuenuge ida veyani kavokavovo, ta 'esi Yaubada
 ena nuanua 'inega, mana Yaubada nuanuana
 kuyavata dina ina lu'ita vane 'inaya adi yoqona
 ana 'ewa yavula weaqina, 'inega ge wese ina
 'aliga nage ina davula. Ta 'abibodanaya Yaubada
 nave'ifoqeyedi 'etoyavua aqiaqi otaqina 'inaya
 natunavo maega. 22 Mana ni'a kahalamanian
 lova 'inega be ana laba ba'e 'itagana kuyavata
 qabudi ihidaida'alo'alolo kavona be vivine visiqa
 ivevebaea edi venatuna 'inaya. 23 * Ta wese
 ita'a tovetumaqana nuadega kaidaida'alo'alolo
 ada 'etoyavua weaqina. Vonahaqiaqi, Niboana
 Gwalagwalana ni'a ka'ewea Yaubada ena nei
 kavovo 'inega, ta ba'e nei nana 'inega Yaubada
 ena veyoluba ni'a kalutonovia, ta ena veyoluba
 qabuna nawale ge kada 'ewa aqiaqiei, mana
 tuta maimai 'inaya Yaubada na'awahaqiaqieda
 natunavo 'idewani, mana ni'a fayayeda. Ta
 omo'e tuta nana 'inaya ena aqiaqi otaqa qabuna
 kana 'ita lobeia. Ta wese ni'a vona fofofolea
 omo'e tuta nana 'inaya 'wafi vauvauna naneida,
 ta 'wafi nana ge ena vekofekofemo be wese ge
 ena 'aligamo. 24 Ita'a Yaubada ni'a 'etoyavuida,

* 8:20-21: Nug 3:17-19 * 8:23: 2Kol 5:2-4

'inega me eda nuave'avina kalulu'ita vane eda toa yavuyavuina weaqina. Mana yavui nana 'eguma ni'a kada 'eweai, e 'inega ge ana aqiaqimo be kana ba'eba'e yavui nana weaqina. ²⁵ Ta 'esi 'eguma taha yani weaqina kalulu'ita vane, ta yani nana nawale ge kada 'eweai, e 'inega ge kana lua'u ta 'esi me eda bibitaqo kana ba'eba'e yani nana weaqina.

²⁶ Ta wese 'idewani tuta nana niboanida idawalili, e 'inega Niboana Gwalagwalana iuiuleda, mana ita'a ge kada alamania ma'oda kana venoqi 'aiqa. 'Inega Niboani nana ge vona 'inega davevenoqi weaqida, ta 'esi ena ida'alo'alolo 'inega vevenoqi weaqida.

²⁷ * Yaubada ita'a tomotau eda nuanua qabuna giwalidaya ni'a alamani aqiaqiedi, ta wese Niboana Gwalagwalana ena nuanua alahalamaniana, mana Niboana nana vevenoqi ita'a tovetumaqana weaqida Yaubada ena nuanua 'inega.

²⁸ * Ta ni'a kahalamaniana vaina tuta yani aqiaqina i'ifo'ifoqe ta vaina tuta yani luveifana i'ifo'ifoqe tomotau 'idaya, ta Yaubada ana fata ba'e yani diavona navefewedi be 'inega vuaqa aqiaqina ina 'ifoqe 'idiega. Yaubada ba'e yani nana naviaqia tomeqabu iveveyolubea 'idia. Ba'e tomotau diavona Yaubada ena nuenuega ni'a venua'ivinedi, be ena nuenuayavo ina viaqidi.

²⁹ * Yaubada tomotau diavona madualamanidi, ta wese ena nuanua 'inega maduvenua'ivinedi be ina veilivu Natuna ena ilivu 'idewani, be yaqisa Natuna Iesu nave'unutau ta vevenua'ivini dina

* **8:27:** Same 139:1 * **8:28:** Efe 1:11 * **8:29:** Kol 1:18; Ibe 1:6

kavona tainavo be novunavo 'idewani. ³⁰ Ta Yaubada taudi vevenua 'ivini dina wese gabedi ina mai 'inaya. Ta gaba nana 'abibodanaya wese 'awatunutunuqedi, 'inega taudina wese vona fofoledi ena aqiaqi otaqa ina 'ita lobe a tauna 'inaya.

Ge tahayani ana fata naha 'usi'ieda Yaubada ena veyoluba 'inega

³¹ * Ta egu vona diavona adi alamani aqiaqi ba'e: 'Eguma ita'a Yaubada maega ni'a kave'aidega, e 'inega ge taha toga nage ge taha yani ana fata be navewaiwai va'ineda. ³² Yaubada Natu Otaqina ge davegagalei, ta 'esi ve'ineiea ana aviayavo nimadia ta iluve'aligia eda luveifana sabi 'ewa yavulidi. Ta 'eguma Yaubada ba'e yani nana viaqia ita'a eda veaqiaqi weaqina, e 'inega kana alamani aqiaqiea wese yani qabuna nanei kavovoda eda toa aqiaqina weaqina. ³³ * Ta 'eguma vaina tomotau Yaubada matanaya ina tovolu ta ina ve'eweda eda luveifana weaqina, 'inega Yaubada edi ve'ewayavo ge wese na'awahaqiaqiedi. Vonahaqiaqi, ita'a qabuda Yaubada ena luvine ni'a kabwegea, ta Yaubada ena nuakolokoloyega ni'a 'awatunutunuqeda. ³⁴ 'Inega ge taha toga ana fata be navonaya, "Yaubada ena tomotauyavo luvematasabu ina 'ewea." Ta wese Iesu Keliso ge 'idewani navona 'aiqa, mana tauna weaqida 'aliga, ta Yaubada giveyawaha 'eviviea weaqida, ta ba'e 'itagana Tamana ana 'ataqia toatoa, ta vevenoqi weaqida. ³⁵ 'Inega ge taha toga nage ge taha yani ana

* **8:31:** Same 118:6 * **8:33:** Ais 50:8-9

fata be naha'usi'ieda Keliso ena veyoluba 'inega, mana Iesu ge wese nanogeda 'eguma vita kana lobedi. Ta wese ge nanogeda 'eguma tomotau ina vevoalaneda. Ta wese ge nanogeda tuta nana botana navunuqida. Ta wese ge nanogeda 'eguma ge ada kalekomo. Ta wese ge nanogeda tuta nana veilaege taha taha kalobelobedi. Ta wese ge nanogeda 'eguma tomotau ivevevonavona sabi luve'aligida. Vonahaqiaqi, ba'e yani diavona kana vebaedi, ^{36*} mana Buki Nugwenugweina vonaya, "Keliso, o'a au wawa weaqina tuta qabuna a'ali'aliga 'waqi. Ima'a kavonaya sifi aba'eba'e ema 'aliga weaqina."

³⁷ Vonahaqiaqi, ge taha tola'ai 'eguma ba'e vita diavona kana lobedi ta kana vebaedi, mana Keliso veveyolubeda, ta tauna 'inega ada fata be yani diavona kana vewaiwai va'inedi.

³⁸ Ta yahalamani aqiaqiea vonigo ge taha yani ana fata be Keliso ena veyoluba 'inega naha'usi'ieda. Ge taha tola'ai 'eguma 'ali'aligida nage mayawaida katoatoa. Ta wese taudi tovale'ewa luveluveifadi be toluvine waiwaidi bwa'obwa'o be mahala nuaninaya itoatoa, ge adi fata be ina vetoasi'ieda Keliso ena veyoluba 'inega. Ta niboana luveluveifadi ge wese adi fata ina vetoasi'ieda Keliso ena veyoluba 'inega. Ta wese egu nuanua ba'itagana be 'ibe weaqina ge ana fata navetoasi'iegu Keliso ena veyoluba 'inega. Ba'e yani diavona ge adi fata be ina a'usi'ieda Keliso ena veyoluba 'inega. ³⁹ Ta wese ge taha yani mahala debanaya nage bwa'obwa'o

* **8:36:** Same 44:22

'aya otaqinaya adi fata be Yaubada 'inega ina vetoasi'ieda. 'Inega ge taha yani kuyavata qabuna 'inega ana fata be ina vetoasi'ieda Yaubada ena veyoluba 'inega. Ta ba'e veyoluba nana Yaubada ve'ifoqeyea 'idaya eda Kaiwabu Ieisu Keliso ena viaqayavo 'idiega.

9

Me Diu ta Yaubada weaqidi

¹ Nuanuagu ena vonemi ma'oda egu tomotauyavo me Diu Yaubada inoga 'aiqei. Ta egu vona ba'e vonahaqiaqi mana Niboana Gwalagwalana vona diavona 'awahaqiaqiedi, 'inega ge wese 'wamomo eda lutonovia Yaubada matanaya vona diavona weaqidi. Ta ge eda u'au'ava, mana ya'a Keliso maega ni'a ave'aidega. ²⁻³* Ya'a giwaliguya yanuavita qiduana ta tuta qabuna yadoudou egu tomotauyavo weaqidi, taudi taigwavo be novugwavo me Diu. Ta 'eguma Yaubada davetoasi'iegu Keliso 'inega be vetoasi'i nana 'inega me Diu 'etoyavua ida lobe, e 'inega egu nuanua 'idewani Yaubada naviaqia egu tomotauyavo adi iula weaqina. ⁴* Vonahaqiaqi, egu tomotauyavo me Diu Yaubada ena nuenuega venua'ivinedi natu otaqinavo. Ta ena simatala aqiaqi otaqina ve'ita 'ifoqeyea 'idia. Ta awafela viaqia taudi maega, ta wese ena luvineavo neidi. Taudi adi luaqiaqi be ina awatuboya Vanue Gwalagwalana 'inaya, ta wese ena vona fofofola aqiaqi otaqidi ni'a i'ewedi. ⁵ Tubudiavo 'idewani Ebelamo be

* **9:2-3:** 'Ifo 32:32 * **9:4:** 'Ifo 4:22; Luve 7:6; 14:1-2; Lom 3:2; 8:15

Aisake ta wese Iakobo taudi Yaubada ena to-motauyavo 'ena'ena'idi. Ta wese Keliso tauna Diu 'olotona, mana me Diu edi gade 'inega vi'oi. Keliso nana tauna Yaubada, ta tauna kuyavata qabuna luviluvinedi, ta luaqiaqiea be tuta qabuna ana awatubo 'eno'eno vatayana nalobelobe a to-motau 'idega! Vonahaqiaqi, eda nuanua 'idewani.

⁶ Vonahaqiaqi, egu to-motauyavo me Diu 'idiega vaina Keliso ge ida 'awahaqiaqiea. 'Inega ma'oda, nage Yaubada ena vona fofofolayavo Ebelamo ta tubunavo 'idia ge ana fata be dave'ifoqeyedi? Ta ge wese 'idewani ona nuanua 'aiqa, mana to-motau ivi'oi me Diu edi gade gamonaya vaidi ge wese Yaubada ena to-motauyavo. ⁷ * Ta wese 'idewani vaina me Diu ivonaya, "Ima'a Ebelamo tubunavo, 'inega ima'a wese natu otaqinavo!" Ta gebu, mana Buki Nugwenugweina 'inaya Yaubada Ebelamo voneaya, "Tubumwavo natuhu Aisake namo 'inega ina 'ifoqe, e taudi 'idewani natu otaqimwavo." ⁸ * Egu vona ana alamani ba'e: Ebelamo tubunavo ena gadeyega i'ifoqe vaidi ge Yaubada natunavo. Vonahaqiaqi, tomeqabu Yaubada ena vona fofofola 'inega i'ifoqe, e taudi Ebelamo natunavo. ⁹ * Mana Yaubada vona fofofola Ebelamo 'inaya vonaya, "Omo'e ya'wala nana 'inaya ena 'evivi ena mai 'imia, ta tuta nana 'inaya moqaneu Sela natuhu me'olotona ina venatunea."

¹⁰ Ta ba'e gwama nana 'aqegigida Aisake. Ta

* **9:7:** Nug 21:12 * **9:8:** Gal 4:23 * **9:9:** Nug 18:10,14

tuta nana ni'a vekilakai 'inega Libeka* vaqidi, ta natunavo didilualua ivenatunedi. 11-12 * Libeka natudiavo didilualua Iso be Iakobo nawale ge ida venatunedi, 'inega gogama diavona ge taha yani aqiaqina nage luveifana ida viaqi, ta nugweta Libeka vale i'ewea Yaubada 'inega vonedia, "Nawale natumi 'unutauna ena gadeyavo ina vetofewa keke'ina ena gadeyavo 'idia." Ba'e vale nana 'inega kana alamani aqiaqiea Yaubada ena venua'ivina ge daviaqia tomotau edi fewa aqiaqina nage luveifana 'idiega, ta 'esi tauna ena nuanua 'inega. 13 * Mana Buki Nugwenugweina 'inaya Yaubada vonaya, "Keke'ina Iakobo yaveyoluba aqiaqiea, ta 'abiboda 'unutauna Iso."

14 'Inega nage taha toga 'imiega una vonaya, "Yaubada ena venua'ivina ge tunutunuqina!" Ta yavonemi, ge wese 'idewani ona nuanua 'aiqa, 15 * mana Yaubada Mosese voneaya, "Tomeqabu ya'a egu venua'ivina

'inega nuanuagu
be ena nuakokoloyedi,
e taudi ena nuakokoloyedi.

Ta tomeqabu ya'a egu venua'ivina
'inega nuanuagu be ena iuledi,
e taudi ena iuledi."

16 * 'Inega Yaubada ena vona fofofola adi 'ewa ge ita'a eda yani. Ge ada fata taudega eda venua'ivina 'inega kana 'ewedi, nage eda vetafe'wa waiwai 'inega ada fata kana 'ewedi, ta

* **9:10:** Libeka "*Rebecca*" taudi Aisake moqanena, ta lawadi Litieli. Libeka dina natudiavo didilualua Iso be Iakobo.

* **9:11-12:** Nug 25:23 * **9:13:** Mal 1:2-3 * **9:15:** 'Ifo 33:19 * **9:16:** Efe 2:8

'esi Yaubada ena nuakolokolo veve'itayea taudi vevenua'ivinidi 'idia.

17* Mana Buki Nugwenugweina 'inaya Yaubada Mosese 'inega me Itifita edi kini Felo 'inaya von-aya, "Ni'a yavenua'ivineu be una vetoluvine ta egu waiwai ena ve'itayea 'iuyega, be yaqisa agu wawa Valena nayawala tomotau qabudi di'we taha taha 'idia." 18 'Inega o'itei, tomeqabu Yaubada nuanuana nanuakolokoloyedi, e 'inega nuakolokoloyedi, ta wese tomeqabu nuanuana nagivedeba 'i'wanidi, e 'inega givedeba 'i'wanidi 'idewani kini Felo.

Yaubada ena gamosoala be ena nuakolokolo

19 'Inega nage taha toga 'imiega navonaya, "Yaubada taunega tomotau venua'ivineda be ma'oda kana toa 'aiqa. 'Inega tola'ai weaqina Yaubada tomotau veve'ewedi edi deba 'i'wana weaqina, mana ana 'ita kavona tovedeba 'i'wana diavona lova Yaubada ena venua'ivina 'inega ivedeba 'i'wana, 'inega ena nuanua iviaviaqia, waisa?" 20 * Ta ge wese 'idewani ona vona 'aiqa! Mana ge daluaqiaqieda be ita'a tomotau Yaubada kana lugwaeyei! Ita'a tomotau Yaubada ena 'iva'ava'ata. 'Inega nage ita'a ada fata be To'iva'ava'ata nana kana voneaya, "Tola'ai weaqina ba'e 'idewani uviaqqa 'aiqegu?" 21 * Ba'e vona diavona ena givesimatalia 'imia 'ulena ana viaqqa 'inega. Tuta nana 'ulena ana toviaqqa 'ulena 'abi'abia bwa'obwa'o bwedibwedinega, e 'inega luaqiaqiea be bwa'obwa'o nana 'inega tauna ena nuenuega 'ulena taha ana 'ita aqiaqina sagali

* 9:17: 'Ifo 9:16 * 9:20: Ais 29:16; 45:9 * 9:21: Iel 18:6

weaqina naviaqia, ta wese taha 'ulena 'aubena kavokavovo weaqina naviaqia.

22 Yaubada luaqiaqia be tauna ena nuanua 'inega ena luvine be wese ena waiwai nave'ifoqeyea tomotau luveifadi adi luvematasabu weaqina. Ta wese Yaubada ena nuanua 'inega ana fata toluveifadi nabibitaqodi. Vonahaqiaqi, adi luaqiaqi be luvematasabu ina lobeia lukwayavonega, ta tua Yaubada me ena bibitaqo ba'eba'eyedi. 23 Ta wese Yaubada nuanuana ena aqiaqi otaqa nave'ita 'ifoqeyea ena tomotauyavo vevenua'ivinidi 'idia, ta ba'e 'inega ena nuakolokolo ina alamani aqiaqia, mana Yaubada tuta lova 'inega 'iva'ava'aidi ena nuanua 'inega be yaqisa mahalaya ina toa ana 'ataqia. 24 'Inega ba'e yani diavona ina 'ifoqe ena tomotauyavo vevenua'ivinidi 'idia, ita'a me Diu ta wese taudi mali qabu 'idia.

25 * Yaubada ena vona ba'e taudi mali qabu weaqidi kana 'itea ena tovesimasimana Osea ena vona 'inega vonaya,

“Tomeqabu taudi lova
ge egu tomotauyavo,
ba'itagana ena gabedi
egu tomotauyavo.

Ta tomeqabu taudi lova
ge eda veyolubedi,
e ba'itagana taudi wese
ena veyolubedi.”

26 * Ta wese Osea vonaya,
“Lova taha di'we 'inaya yavonedia,

* 9:25: Ose 2:23 * 9:26: Ose 1:10

‘Omi’a ge egu tomotauyavo.’

Ta ba’itagana

omo’e di’we nana ’inaya navonedea,

‘Omi’a Yaubada mayawaina

ta Toatoa Vatayana natunavo.’ ”

27* Ta me Isileli weaqidi Yaubada ena tovesimasi-
mana Aisea ’enana waiwainega simana ’ifoqe
vonaya,

“Vonahaqiaqi,

me Isileli adi qabu

kavona gelasa balabalaya ’idewani,

ta ’idiega ’evisa dimo

Yaubada na’etoyavuidi,

28 mana eda Kaiwabu

ena luvine ’ebelu’ovoa

nave’ifoqeyea di’we nana

ana totoayavo ’idia

ta lukwayavonega naluveawalidi

lova ena vona ’idewani.”

29* Ta wese Aisea ba’e yani nana weaqina vonaya,

“Lova eda Kaiwabu Tovewaiwai

’evisa damo awafeleda

be mayawaida katoa.

Ta ’eguma gebu,

e ’inega qabuda daluvegwamumuida

kavona me Sodoma

be me Gomola ’idewani.”

Me Isileli Iesu Valena inogea

30 Egu vona diavona ’idiega yani qabuna ni’a
yave’itemi Yaubada ena venua’ivina taudi me
Diu weaqidi. ’Inega egu vona ’ebelu’ovoa ba’e
yani nana weaqina ona noqolia. Taudi mali

* 9:27: Ais 10:22-23 * 9:29: Ais 1:9

qabu ge taha 'eda'eda ida salia sabi veaqiaqi Yaubada matanaya, ta tua edi vetumaqana 'inega ivetunutunuqa matanaya. ³¹ Ta 'esi me Diu ivetafe'wa waiwai luvine ana 'abiboda 'inaya, be vonigo ida vetunutunuqa Yaubada matanaya, ta ge adi fata be ida vetunutunuqa matanaya luvine ana 'abiboda 'inega. ³² * Ta ivetafe'wa 'wayoqa, mana ge nuanuadi ina vetunutunuqa vetumaqana 'inega, ta 'esi nuanuadi edi fewa luvine weaqina 'inega ina vetunutunuqa Yaubada matanaya. Ta edi noga 'inega kavona be 'aqedi ida 'evetufei dabo 'inaya ta ida be'u. ³³ * Vonahaqiaqi, ba'e yani nana weaqina Aisea vonaya, "Onoqoli,

Ielusalema 'inaya
 dabo ena a'uya,
 ta tauna dabo nana 'inaya
 tomotau 'aqedi ina vetufedi
 ta ina be'u.
 Ta aiqabu dabo nana
 ina vetumaqanea,
 e ge wese ina nuavita,
 mana tola'ai Yaubada lova
 vona fofofolei ana aqiaqi
 ina 'itea."

10

'Etoyavua tomotau qabudi weaqidi

¹ Taigwavo be novugwavo, nuanuagu qiduana egu tomotauyavo me Diu qabudi 'etoyavua ina lobe, 'inega yavevenoqi waiwai Yaubada

* **9:32:** Ais 8:14 * **9:33:** Ais 8:14; 28:16; 1Fit 2:6

'inaya 'etoyavua nana weaqina. ² Edi awafela waiwaina Yaubada ana alamani weaqina ni'a yahalamani aqiaqiea. Ta Yaubada ena nuanua taudi weaqidi ge ida alamania, 'inega itauya gei, ³ mana Yaubada ena 'eda'eda tomotau eda vetunutunuqa matanaya weaqina ge ida 'awahaqiaqiea. 'Inega taudi edi nuenuaga nuanuadi ina vetunutunuqa Yaubada matanaya luvine ana matayaga 'inega. Ta ba'e 'inega Yaubada ena 'eda vetunutunuqa weaqina ivakesiea. ⁴ Vonahaqiaqi, ni'a kahalamanian ba'e 'itagana tomotau ge daluaqiaqiedi be luvine ina 'abibodedi edi vetunutunuqa Yaubada matanaya weaqina, mana Keliso luvine ana 'abiboda givelua'uya ena 'aliga 'inega. E 'inega aiqabu ivetumaqanea ni'a ivetunutunuqa Yaubada matanaya.

⁵ * Eda vetunutunuqa Yaubada matanaya luvine ana 'abiboda 'inega weaqina Mosese ba'e 'idewani vona 'aiqa vonaya, "Tomeqabu luvine qabudi ina 'abibodedi, e taudi luvine diavona 'idiega yawai vataya ina lobe." ⁶ * Ta vetunutunuqa Yaubada matanaya vetumaqana Keliso 'inega weaqina Buki Nugwenugweina vonaya, "Tau'uyega ge una voneuya, 'Ana 'ita be taha toga navane mahalaya.'" (Be Keliso na'ebe'ewei nawebui miea ada 'etoyavua weaqina.) ⁷ Ta wese Buki nana vonaya, "Tau'uyega ge una voneuya, 'Togama nawebui bwa'obwa'o 'aya otaqinaya?" (Be vonigo Ieisu na'ebe'ewei namiea to'aliga edi di'we 'inega.) Ba'e 'idewani ge kana nuanua 'aiqa,

* **10:5:** Luvi 18:5 * **10:6:** Luve 30:12-14

mana Keliso ni'a webui mai sabi 'etoyavuida, ta wese ni'a ya'itoto 'evivi 'aligea. ⁸ Ta 'esi 'eguma taha toga Keliso ni'a vetumaqanea, e 'inega ana fata be Buki Nugwenugweina ena vona navetutumea navonaya, "Etoyavua vetumaqana 'inega Valena tomotau ni'a vadi'wedi'wedi, ta Vale nana sofadiega ni'a ivonavonayea ta wese giwalidia ni'a 'eno'eno." E ba'e Vale nana vetumaqana Iesu Keliso 'inaya weaqina ni'a asimasimana 'ifoqeyea tomotau 'idia.

⁹ Ta Vale nana ana alamani ba'e: 'Eguma tomotau matadia 'awauyega una simana 'ifoqe vonigo Iesu tauna eu Kaiwabu, ta wese 'eguma giwaliuyega una vetumaqana vonigo Yaubada Iesu giveya'itotoya 'aligea, e 'inega Yaubada na'etoyavuii. ¹⁰ Mana eu vetumaqana giwaliuya 'inega una vetunutunuqa Yaubada matanaya, ta eu simana 'ifoqe 'inega 'etoyavua una lobe. ¹¹ * 'Idewani Buki Nugwenugweina Keliso weaqina vonedaya, "Togama vevetumaqana 'inaya, e tauna ena vetumaqana vuaqina ge wese na'ita 'avei, mana Yaubada ena vona fofofola adi aqiaqi na'ifoqe 'inaya." ¹² * Vonahaqiaqi, taudi me Diu ta wese mali qabu ge ida vedumaduma matanaya, mana eda Kaiwabu 'aidegana. Ta aiqabu ina venoqiea iula weaqina e 'inega ena veyoluba aqiaqi otaqina nanei kavovodi, ¹³ * mana Buki Nugwenugweina ana to'wayavi taha 'idiega ana wawa Ioeli vonaya, "Aiqabu ina venoqi Kaiwabu ana wawa 'inega 'etoyavua ina lobe."

¹⁴ Ta ma'oda, nage me Diu adi fata be Iesu

* **10:11:** Ais 28:16 * **10:12:** Via 15:9 * **10:13:** Ioe 2:32

ina venoqiea 'etoyavua weaqina 'eguma ge ida vetumaqanea? Gebu, ge adi fata. Ta ma'oda, nage adi fata be ina vetumaqanea 'eguma Valena ge ida noqolia? Gebu, ge adi fata. Ta wese ma'oda, nage adi fata be Vale nana ina noqolia 'eguma ge taha toga nalugaihiea 'idia? Gebu, ge adi fata. ¹⁵ * Ta ma'oda, nage ana fata be taha tolugaihi natauya 'idia be Vale nana naneidi 'eguma Yaubada ge taha tolugaihi davetunei? Gebu, ge ana fata! E ba'e yani nana weaqina Buki Nugwenugweina vonayea, "Vonahaqiaqi, ana tolugaihi edi mai yani aqiaqi otaqina." ¹⁶ * Vonahaqiaqi, Vale nana mai me Diu 'idia ta vaidi ge ida 'awahaqiaqiea, mana Yaubada ena tovesimasimana Aisea wese vonayea,

"Kaiwabu,

ana 'ita kavona

ema lugaihi Vale nana weaqina

tomotau 'evisa dimo ivetumaqanea."

¹⁷ 'Inega kahalamania, Keliso Valena ana lugaihi 'inega tomotau edi vetumaqana i'ewe'ewe, ta ba'e Vale nana mai Yaubada ena tolugaihiavo 'idiega.

¹⁸ * Nage taha toga 'imiega navonaya, "Ta ma'oda me Diu weaqidi, nage taudi Ieisu Valena ge ida noqolia?" Ta yavona aqiaqiemi, ni'a inoqolia mana Buki Nugwenugweina vonaya,

"Tolugaihi edi simana

ni'a yawala tomotau qabudi 'idia,

ta vona diavona ni'a i'ifoqe

di'we taha taha 'idia."

* **10:15:** Ais 52:7 * **10:16:** Ais 53:1 * **10:18:** Same 19:4

19* Ta nage wese taha toga navonaya,
 “Nage me Diu nuadi ge da’eqa’u aqiaqiea
 Vale nana weaqina?”

Ta yavona aqiaqiem, nuadi ni’a ’eqa’uya, mana
 Yaubada Mosese ena tuta ’inaya me Diu weaqidi
 vonaya,

“Me Diu edi ve’ifi’ifi ena give’ena’ia
 egu veyoluba ’inega taudi ge me Diu ’idia,
 ta wese me Diu ena givegamosoalidi
 egu veyoluba ’inega
 taudi ge me Diu ’idia,
 mana me Diu ivonaya be
 taudi ge me Diu tovekwavakwava.”

20* Ta wese Aisea me ena giwalifatu Yaubada ena
 vona taudi ge me Diu weaqidi vonaya,
 “Tomeqabu ge ida sali dadana weaqigu,
 e taudina ina lobegu.

Ta wese tomeqabu ge ida venoqiegu
 iula weaqina,
 e taudi ’idia ena ve’ifoqeyegu.”

21* Ta me Diu weaqidi Yaubada vonaya,
 “Tuta kuena nuanuagu be
 ena ’ebe’ewedi ina mai ’iguya,
 ta taudi ge ida matayagegu
 ta wese egu nuanua taudi weaqidi inogea.”

11

Yaubada ena nuakolokolo me Diu weaqidi

1* ’Inega ena vetala’aiemi, nage Yaubada ena
 tomotau me Diu ni’a nogedi? Gebu’e otaqa! Ona

* **10:19:** Luve 32:21 * **10:20:** Ais 65:1 * **10:21:** Ais 65:2

* **11:1:** 1Sam 12:22; Same 94:14; Fil 3:5

nuave'avinia ya'a taugu wese Diu 'olotogu, ta ya'a Ebelamo tubuna ta wese Beniamina ena gade 'inega, ta Yaubada ge danogegu.

² Vonahaqiaqi, Yaubada tuta ana 'ebeve'ale 'inaya ena tomotauyavo maduvenua'ivinedi 'etoyavua weaqina, 'inega ba'e 'itagana ge wese danogedi. Buki Nugwenugweina ena vona ba'e weaqina ona nuave'avinidi tuta nana Yaubada ena tovesimasimana Ilaitia me Diu weaqidi vetalabudabuda Yaubada 'inaya vonaya, ³ * “Kaiwabu, eu tovesimasimanayavo qabudi ni'a iluve'aligidi, ta eu 'ebevegubayavo ibwega yavuledi. Ta ya'a eu tovesimasimana agu 'aidegamo yatoatoa, ta ba'e 'itagana nuanuadi ya'a wese ina luve'aligigu.” ⁴ * Ta ona nuave'avinia Yaubada ba'e 'idewani Ilaitia ena vona ve'iea vonaya, “Ge una nuanua, mana ya'a tomotau adi qabu seveni tausani (7,000) taudi wese ge taha tuta ida iwa'odu tokwalui Balo* 'inaya ni'a yaha'udumedumedi itoatoa weaqigu.” ⁵ Ta ba'e 'itagana wese vaidi me Diu vevenua'ivinedi Yaubada ena nuakolokolo 'inega 'etoyavua ni'a ilobe, mana me Diu qabudi Yaubada ge ida nogei. ⁶ * Ta 'eguma 'etoyavua ni'a ilobe Yaubada ena nuakolokoloyega, e 'inega ge wese taudiega edi viaqa aqiaqina 'inega. Mana 'eguma edi viaqa 'inega 'etoyavua ida lobei, e 'inega 'etoyavua nana ge Yaubada ena

* **11:3:** 1Kin 19:10,14 * **11:4:** 1Kin 19:18 * **11:4:** Tuta nana me Isileli ilugu Kenani 'inaya, 'inega di'we nana ana totoayavo edi tokwalui Balo “*Baal*” ihiwa'odu 'inaya. 'Inega me Isileli wese ive'ale iwa'odu Balo nana 'inaya, ta Yaubada otaqa inuafania. * **11:6:** Gal 3:18

nuakolokolo 'inega da'ifoqe.

7 'Inega me Diu edi toa ba'e 'idewana: Von-ahaqiaqi, qabudi isalisali waiwai Yaubada ena nuakolokolo weaqina, ta ena venua'ivina 'inega 'evisa dimo nuakolokolo nana ilobea. Ta me Diu 'eali dina Yaubada nuadi 'egiveatufia, 'inega ge wese ida nuanua tauna weaqina. 8* Ba'e weaqina Buki Nugwenugweina simana vonaya,

“Yaubada me Diu nuadi giveatufidi,

ta ana laba ba'e 'itagana
matadi 'eumabodea
be 'inega ge adi fata be
'etoyavua ana 'eda ina 'itei,
ta wese teniqadi 'egibodea
'inega Yaubada ena vona
ge adi fata be ina noqoli.”

9* Ta wese kini Deibida ba'e yani nana weaqina simanea, vonaya,

“Yaubada, nuanuagu nuadi
una giveatufidi edi sagali 'unena
ana qaiawa 'inega,
ta qaiawa nana 'inega ina vonaya be
vonigo edi toa aqiaqi otaqina.

Ta qaiawa nana 'inega kavona
taudiega ni'a isi'wedi,
mana voaladiavo ina luveafedi
ta ina kafidi.

Ta edi gagasa 'inega luvematasabu
ina lobeas edi luveifana
ana 'etofwafwa 'inega.

10 Nuanuagu matadi una umea
'inega eu viaqa aqiaqidi weaqidi

* 11:8: Luve 29:4; Ais 29:10 * 11:9: Same 69:22-23

ge adi fata be ina 'itedi,
 ta gwavudi una givekuyuya
 nakuyu veiveifa tuta qabuna
 vita taha taha adi 'avala 'idiega.”

¹¹ * 'Inega nage ona vonaya be Yaubada ena tomotauyavo vevenua'ivinidi ni'a ida be'u vataya edi luveifana tauna 'inaya weaqina. Ta ge 'idewani ona nuanua 'aiqa, mana Yaubada ena viaqayavo 'idiega nuanuana 'etoyavua ana 'eda nave'ifoqeyea taudi mali qabu 'idia. E ba'e 'inega me Diu 'etoyavua nana ina 'itea, 'inega taudi wese nuadi na'ewea be nuanuadi ina 'ewa aqi-aqiea. ¹² Ta ona nuaia, 'eguma tomotau qabudi bwa'obwa'oya Yaubada ena veyoluba qiduana ni'a ilobea me Diu edi luveifana ta wese edi be'u 'inega, e 'inega ona alamani aqiaqiea nawale tuta nana me Diu qabudi vevenua'ivinidi ina nua-givila be 'etoyavua leisu 'inega ina 'awahaqiaqiea, 'inega Yaubada ena veyoluba qidua va'inena nave'ifoqeyea tomotau qabuda 'idaya.

¹³ Ta wese nuanuagu omi'a ge me Diu vaina yani weaqidi ena vonemi. Yaubada ni'a venua'ivinegu be yavetovaletuyana omi'a weaqimi. Ta ena venua'ivina weaqigu ya'awahaqiaqiea ta yavetafe'wa waiwai weaqina, ¹⁴ mana nuanuagu qiduana taha 'eda'eda ena lobei, 'inega taudi me Diu omi'a ge me Diu ami 'etoyavua ina 'itea, ta taudi wese ina nua'ewa weaqina sabi 'ewana. Ta egu fewa nana 'inega nage Yaubada egu tomotau me Diu vaidi na'etoyavuidi. ¹⁵ Vonahaqiaqi, 'eguma me Diu edi noga 'inega Yaubada 'etoyavua ni'a ve'ifoqeyea mali tomotau bwa'obwa'oya

* **11:11:** Via 13:46

'idia, e 'inega kana alamani aqiaqiea be tuta nana me Diu Keliso ina 'awahaqiaqiea adi 'etoyavua weaqina, e 'inega Yaubada me Diu wese na'awahaqiaqi 'eviviedi. 'Inega kavona ina yawaha 'evivi edi 'aliga 'inega.

¹⁶ Vonahaqiaqi, Yaubada Ebelamo givegwalea, e 'inega tubunavo qabudi wese gwalagwaladi. Egu vona ba'e ena givesimatalia 'imia, onoqolia! 'Eguma taha toga falawa nawayavilei, ta falawa nana 'inega dibuna na'ewei navegubayea Yaubada weaqina, e 'inega falawa qabuna wese ni'a vegwalagwala. Ta wese 'idewani 'aiwe, mana 'eguma 'aiwe kwalamina gwalagwalana, e 'inega wese laqanavo gwalagwaladi. ¹⁷ * Vona sesebai taha ena neimi omi'a ge me Diu weaqimi. Taudi me Diu kavona taha 'aiwe olibe vaoqaya tabotabo. Ta omi'a ge me Diu kavona muta'wa ana olibe. 'Inega tonivaoqa vaoqa ana olibe laqana bai yavuledi, ta 'esi olibe muta'wa laqana 'ewedi be tubwedi vaoqa nana ana olibe 'inaya. E ba'e 'inega omi'a wese Yaubada ena vona fofofola veyoluba qiduana weaqina Ebelamo be tubunavo 'idia ni'a o'ewea, mana omi'a vaoqa ana olibe 'inaya ni'a otubwe, ta olibe nana bodona 'inega emi waiwai o'ewe'ewea.

¹⁸ Vonahaqiaqi, omi'a laqa diavona baibai yavulidi oilafedi. 'Inega yavonevonemi, ge ona nuavane ba'e ilafa nana weaqina. Ta 'esi ona nuave'avinia omi'a kavona 'aiwe laqana ta ge kwalamina, mana omi'a laqana ge ami fata be kwalama ona iuledi, ta 'esi kwalama omi'a iuiulemi. ¹⁹ 'Inega nage ona vonaya, "Yaubada

* **11:17:** Efe 2:11-19

omo'e laqa diavona bai yavuledi ta 'inega ima'a ni'a ailafedi." ²⁰ Vonahaqiaqi 'idewani, ta ge ona nuafania ba'e laqa diavona taudi me Diu Yaubada bai yavuledi, mana ge ida vetumaqanea, ta omi'a oilafedi mana ovetumaqanea. 'Inega ge taumiega ona nuavane weaqimi, ta 'esi ona 'itamaki aqiaqimi be yaqisa omi'a ge ona veilaqe me Diu 'idewani. ²¹ Mana 'eguma Yaubada 'aiwe nana laqa otaqinavo ni'a bai yavuledi, e 'inega omi'a wese nabai yavulemi 'eguma ona nogea.

²² * E ba'e vona sesebai nana 'inega kana alamani aqiaqiea Yaubada tauna Tonuakolokolo ta wese Toluvine falafalana, mana Yaubada me Diu luvine falafalana neidi. Ta omi'a ge daluvinemi, mana ena 'eda ami 'etoyavua weaqina o'awahaqiaqiea, 'inega nuakolokoloyemi. Ta vonahaqiaqi, omi'a wese ana fata be naluvematasabumi 'eguma ena nuakolokolo ona nogea. ²³ Vonahaqiaqi, taudi me Diu 'etoyavua ana 'eda lova ni'a inogea, ta 'eguma ina nuagivila ta 'eda nana ina 'awahaqiaqiea, e 'inega Yaubada natubwe 'eviviedi 'aiwe nana 'inaya. Tauna ana fata be ena waiwaiega ba'e yani nana naviaqia. ²⁴ Ana 'ita ge daluaqiaqiei 'eguma taha toga olibe muta'wa laqana nada'a yavulei ta laqa nana natubwea ena 'aiwe aqiaqina 'inaya. Ta vonahaqiaqi, ba'e yani nana Yaubada viaqia omi'a ge me Diu 'imia, mana omi'a kavona olibe muta'wa laqana, ta 'esi tubwemi ena 'aiwe aqiaqina 'inaya. Ta 'eguma Yaubada ba'e yani nana ni'a viaqia omi'a weaqimi, 'inega ona alamani aqiaqiea nuanuana qiduana me Diu natubwe 'eviviedi tauna

* **11:22:** Ion 15:2,4

'inaya, mana tauna edi 'aiwe aqiaqi.

Yaubada ena nuakolokolo tomotau qabuda weaqida

²⁵ Egwavo omi'a ge me Diu, nuanuagu qiduana Yaubada ena viaqayavo 'ebenuavoqana me Diu weaqidi ona alamani aqiaqiedi, mana 'eguma ona alamanidi, 'inega ge taumi weaqimi ona nuavane ta ona vonaya,

“Ima'a aqiaqi otaqima,

ta 'abiboda taudi me Diu.”

Ta nuanuagu ona alamania vonigo me Diu nawale me edi deba 'i'wana itoatoa. Ta ba'e 'idewani ina toatoa ana laba omi'a ge me Diu ami yau ana 'etofwafwa na'ifoqe Yaubada ena nuanua 'inega.

²⁶ * Ta ba'e 'inega me Isileli qabudi 'etoyavua ina lobe, mana Buki Nugwenugweina 'inaya Aisea simana vonaya,

“To'etoyavua namai ima'a

me Diu 'imega,

ta tauna me Isileli

edi viaqa veifana

na'ewa yavulea 'idiega.”

²⁷ * Ta wese Aisea vonaya,

“Inega ya'a Yaubada

ena vona fofofoleli

be edi ilivu luveifana weaqina

ena nuataqodi.”

²⁸ Vonahaqiaqi, me Diu 'ealidi nawale Vale Aqiaqina Keliso weaqina ivevevoalanea. Ta edi noga 'inega omi'a ge me Diu oveaqiaqi otaqa, mana Yaubada ena iula o'ewa kavovoya.

* **11:26:** Ais 59:20-21 * **11:27:** Ais 27:9; Iel 31:33-34

Ta ona nuave'avinia me Diu taudi Yaubada ena tomotauyavo vevenua'ivinidi. Ta wese veveyolubedi, mana ena vona fofofolayavo i'ewedi tubudiavo Ebelamo be, Aisake ta wese Iakobo 'idiega. ²⁹ Ba'e 'idewani yavona 'aiqemi, mana 'eguma Yaubada taha yani ni'a neida, nage wese ni'a venua'ivineda be tauna maega kana toa, e 'inega nei kavovo nana be gaba nana ge wese na'ewa 'eviviedi. ³⁰ Lova omi'a ge me Diu Yaubada ovevoalanea, ta tuta nana me Diu Yaubada ena nuakolokolo inogea, e 'inega omi'a nuakolokolo nana o'ewa kavovoya. ³¹ Ta ba'e 'itagana wese 'idewani taudi me Diu Yaubada ivevoalanea. Ta nawale taha tuta 'inaya taudi wese Yaubada ena nuakolokolo ina 'ewa kavovoya omi'a 'idewani. ³² Yaubada tomtau qabuda awafeleda be taudega kayoqonida eda noga 'inega, be yaqisa taunega ana fata be ena nuakolokolo nave'itayea 'idaya.

Awatubo Yaubada 'inaya

- ³³ * Vonahaqiaqi,
 ge taha toga 'idewani Yaubada!
 Tauna ena alamani qidua otaqina be,
 ena nuanua aqiaqi otaqina
 ta wese ena kaikaiwabu qidua va'inena.
 Ge taha toga ana fata ena luvineavo
 be ena 'eda'edayavo nahalamanidi!
- ³⁴ * 'Idewani Buki Nugwenugweina simana von-
 aya,
 "Nage taha toga ana fata be
 Yaubada ena nuanuayavo nahalamanidi?"

* **11:33:** Ais 55:8-9 * **11:34:** Ais 40:13; 1Kol 2:16

Ta wese nage taha toga
ana fata be nalugaihia?
Ge taha toga.”

35 * Ta wese vonaya,
“Ge taha toga ana fata be
taha yani aqiaqi otaqina
Yaubada naneia be 'inega
Yaubada luaqiaqiea
be tomotau nana nave'iea.”

36 * Ba'e vona diavona Yaubada weaqina vona-
haqiaqi, mana yani qabuna tauna 'inega i'ifoqe,
ta kuyavata qabuna ena waiwai 'inega nawale
itoatoa. Ta ba'e yani diavona itoatoa ana awatubo
weaqina.

'Inega Yaubada kana awatuboya
tuta vataya 'idia.

Vonahaqiaqi, eda nuanua 'idewani!

12

Yawaida kana awafelea Yaubada weaqina

1 * Egwavo, ni'a yave'itemi Yaubada ena nu-
akolokolo 'idaya weaqina, 'inega nuanuagu qid-
uana 'wafimi qabuna ona vefewedi yani qabuna
aqiaqina be gwalagwalana weaqina. E 'inega
taumiega ona ve'ineiemi Yaubada 'inaya kavona
guba mayawaina 'idewani, e ba'e 'inega ona give-
qaiawe. Mana 'eguma taumi ona nuaia Yaubada
ena viaqa aqiaqi otaqina 'imia weaqina, e 'inega
ge yani vitana weaqina eda vevenoqiemi, waisa?

* 11:35: Iob 41:11 * 11:36: 1Kol 8:6 * 12:1: Lom 6:11,13;
1Fit 2:5

2 'Inega bwa'obwa'o ana ilivu luveifadi ge ona vetutumedi! Ta 'esi ona awafelemi Yaubada 'inaya be 'inega emi nuanuayavo nagive'evaunidi, be 'inega ona vetomotau 'evau. Ta ba'e 'inega ami fata be Yaubada ena nuanua weaqimi ona alamanía ta ona viaqia. Ta wese ba'e 'inega ona alamanía tola'ai aqiaqina matanaya be 'inega ona giveqaiaweá. Ta wese emi ve'evau 'evivi 'inega ami fata ona alamanía ma'oda ona toa 'aiqa.

3 * Yaubada ena nuakolokolo 'inega yaveto-valetuyana, 'inega ya'a egu luvine 'inega omi'a 'aidega 'aidega yavonavona waiwaina 'imia: Ge taumi emi nuanua 'inega ona a'uvaneqemi, ta 'esi ona nuanua aqiaqi tuta nana taumi weaqimi onuanua. Omi'a 'aidega 'aidega emi vetumaqana ni'a o'ewea Yaubada ena nuanua 'inega, e 'inega wese 'aidega 'aidega emi vetumaqana ana 'etofwafwa 'inega taumiega emi aqiaqina ona 'etofwafwea.

4 * 'Ebevetalatutula ba'e ena neimi: Ita'a tomotau 'wafida 'inaya du'u 'eala i'eno'eno, ta du'u 'aidega 'aidega me edi fewa. 5 Ta wese Keliso 'wafina 'idewani. Ita'a tovetumaqana kavona Keliso 'wafina du'unavo, ta 'aidega 'aidega eda fewa dumadumana be dumadumana, 'inega du'u taha taha kaveveiuiula, mana ita'a 'wafi 'aidegana.

6 * Yaubada ena nuakolokolo 'inega ita'a 'aidega 'aidega eda alamani be eda waiwai neida sabi vefewadi tauna ena nuanua 'inega. Ta wese 'idewani wila'a taha taha tomotau taha taha neida. 'Inega 'eguma Yaubada au wila'a neiu

* 12:3: 1Kol 12:11; Efe 4:7; Fil 2:3

* 12:4: 1Kol 12:12,27

* 12:6: 1Kol 12:4-11; 1Fit 4:10-11

ena vona sabi simana 'ifoqeyedi, e 'inega una simana 'ifoqeyedi 'eguma eu vetumaqana 'inega ualamani aqiaqiea vona nana Yaubada 'inega mai. ⁷ Ta 'eguma Yaubada au wila'a neiu mali tomotau sabi iuladi, e 'inega una iula aqiaqiedi. Ta 'eguma Yaubada au wila'a neiu ena vona ana ve'ita weaqina, e 'inega una ve'ita aqiaqiedi. ⁸ Ta 'eguma Yaubada vona iula ana wila'a ni'a neiu, e 'inega tomotau una vona iuledi. Ta 'eguma Yaubada 'iwavo ana wila'a ni'a neiu, e 'inega eu kulufa ge una vegagaledi. Ta 'eguma Yaubada vanugweta ana wila'a ni'a neiu, e 'inega tomotau una vanugwetedi eu waiwai qabuna 'inega. Ta 'eguma nuakolokolo ana wila'a Yaubada ni'a neiu, e 'inega me eu qaiawa tomotau una nuakolokoloyedi.

⁹ Tomotau giwali otaqiuyega una veyolubedi, ta gebu u'ava 'inega. Viaqa luveifadi una vevoalanedi, ta 'esi viaqa aqiaqi otaqidi adi viaqa una kafi'ihidi. ¹⁰ * Ta ma emiavo ona veyoluba aqiaqiemu kavona taimiavo be novumiavo oveveylubedi 'idewani. Ta me emi awafela emiavo ona 'amayaba aqiaqiedi, ta 'abiboda omi'a. ¹¹ Ta ge ona vegwavu'ai emi fewayavo 'idia, ta 'esi me emi gwavubiga aqiaqi ona vetofewa eda Kaiwabu weaqina. ¹² * Ona qaiawa, mana ni'a oalamani aqiaqiea Yaubada ena nuanua aqiaqina weaqimi tuta maimai 'inaya nave'ifoqeyea 'imia, 'inega ba'e yani nana weaqina oba'eba'e. Ta wese me emi bibitaqo ona toa 'eguma vita taha taha ina 'ifoqe 'imia, ta ge ona lua'u venoqi Yaubada

* **12:10:** 1Fit 1:22 * **12:12:** 1Te 5:16-18

'inaya. ¹³* Ta 'eguma Yaubada ena tomotauyavo vaina yani weaqina ina kusa, e 'inega ona iuledi. Ta 'eguma wagawaga imaimai, e 'inega ona 'ebe'ewedi emi vanueavo 'idia ta ona ve'ainidi be wese edi 'ebe'eno ona 'iva'ava'aia weaqidi.

¹⁴* Ta 'eguma tomotau vita ina neimi mana omi'a Iesu ana to'abibodayavo, e 'inega ge ona vona ve'alatedi, ta 'esi ona venoqi Yaubada 'inaya be navona veyolubedi. ¹⁵ Ta tuta nana tomotau iqaiqaiawa 'inega luaqiaqiemi be wese omi'a taudi maega ona qaiawa. Ta 'eguma tomotau inu-anuavita, 'inega luaqiaqiemi be omi'a ona iuledi be edi nuavita ona 'avalea taudi maega. ¹⁶* Ma emiavo ona toadaumwala. Ta ge ona nuavane taumi weaqimi, ta 'esi tomotau kavokavovo maega ona veiaiana aqiaqi. Ta ge taumiega ona vonemia be omi'a toalamani aqiaqi.

¹⁷* Ta 'eguma tomotau ina veilivu veifemi 'inega omi'a ge ona ve'iedi ilivu veifana 'inega. Ta tuta qabuna emi ilivu ona 'itamaki aqiaqiedi be yaqisa tomotau ina 'awahaqiaqiemi. ¹⁸ 'Inega una lumata'i'ihui be yaqisa ge taha luveifana nage ve'ae'aetoga 'iuyega na'ifoqe, ta 'esi una tovo waiwai be tuta qabuna toadaumwala ilivuna una toayea tomotau qabudi maega.

¹⁹* Egwavo ye, ge taha tuta taumiega ami mebu ona 'ewa, ta 'esi mebu nana ona ve'ineiea Yaubada 'inaya, mana tauna taha 'aubena 'inaya toveilivu veifa naluvematasabudi. Ta ba'e weaqina Buki Nugwenugweina simana vonaya, "Ya'a Kaiwabu

* **12:13:** Ibe 13:2 * **12:14:** Md 5:44; 1Kol 4:12 * **12:16:** Vos 3:7 * **12:17:** 1Te 5:15 * **12:19:** Luve 32:35; Md 5:39

mebu nana weaqina luaqiaqiegu be taugu ena 'ewe. Ta tomeqabu luveifana ni'a iviaqia ya'a ena ve'iedi." 20* Buki Nugwenugweina vonaya,

“Eguma voalau nabotana
e 'inega una ve'ainia,
ta 'eguma magana nayafaia
e 'inega una venumea.

Mana 'eguma ba'e 'idewani
una viaqia 'inaya,
e 'inega una giveiniyauyauyea
ena viaqa luveifana 'iuya weaqina.”

21 Ge una awafeleu ilivu luveifana 'idia be ina luvineu, ta 'esi una vewaiwai va'inedi eu viaqa aqiaqi otaqidi 'idiega.

13

Toluvineavo edi luvine kana 'abibodedi

1* Omi'a emi gabemaniavo ona matayagedi, mana Yaubada ena nuanua 'inega toluvineavo bwa'obwa'oya a'udi be ina luvine. Ta gabemaniavo qabudi Yaubada ena venua'ivina 'inega iluviluvine. 2 'Inega tomeqabu gabemani diavona edi luvine ge ida matayagedi, e taudi wese Yaubada ena nuanua inogea, ta ba'e 'inega taudiega adi luvematasabu imimiea 'idia. 3* Toaqiaqidi ge edi 'iumo be toluvineavo ina mwaninivedi, ta 'esi taudi toluveifadi ina mwaniniva 'idia, mana taudi luvine ibwegebwegea. 'Inega 'eguma ge nuanuami toluvineavo ona mwaninivedi, e 'inega edi nuanua ona matayagedi. Ta emi matayaga

* 12:20: Vos 25:21-22; Md 5:44

* 13:1: Tai 3:1; Vos 8:15

* 13:3: 1Fit 2:13-14

'inega ina 'awahaqiaqiemi. ⁴ 'Inega toluvineavo Yaubada a'udi sabi iulami. Ta 'eguma omi'a yani luveifana oviaviaqia 'inega luaqiaqiemi be ona mwaninivedi, mana luvematasabu ona lobe a 'idiega. Vonahaqiaqi, toluvine diavona taudi Yaubada ena tofewayavo, ta Yaubada ana diavilavila toluveifadi edi viaqayavo weaqina adi luvematasabu ina ve'ifoqeyea 'idia. ⁵ 'Inega luaqiaqiemi be gabemaniavo ona matayagedi, mana 'eguma ge ona matayagedi e 'inega luvematasabu ona lobe a. Ta wese giwalimiega ni'a oalamani aqiaqiea ita'a tomotau luaqiaqieda be gabemaniavo kana matayagedi.

⁶* Ta wese ba'e 'iu nana 'inega ona takesi gabemani 'idia, mana mane nana 'inega edi tofewayavo ivevemaisidi be yaqisa fewa nana Yaubada ni'a neidi adi fata ina viaqia. ⁷ 'Inega luaqiaqiemi be 'eguma gabemani 'idiega luvine 'eno'eno yani taha taha adi vemaisa weaqina, e 'inega ona vemaisia. 'Inega 'eguma gabemani takesi weaqina ina vonemi, e 'inega ona vemaisia. Ta wese 'eguma takesi ina a'uya kulufa taha taha adi maisa weaqina, e 'inega wese ona vemaisia. Ta wese luaqiaqiemi be tomeqabu adi luaqiaqi be 'amayaba ina lobe a 'imiega, e 'inega taudi ona 'amayabedi.

⁸* Vonahaqiaqi, ami loaga qabudi ona vemaisia 'ovoidi, ta 'esi yani ta'a mona ge wese ana fata be ona vemaisia 'ovoi, e ba'e yani nana veyoluba ilivuna emiavo maega. Mana ge taha toga ana fata be iana naveyoluba va'inei ta navoneaya, "Ba'e ta'iwa, egu veyoluba ana 'ebeluvova!"

* 13:6: Md 22:21 * 13:8: Md 22:39-40; Iem 2:8

Ta 'esi 'eguma iau una veyoluba aqiaqiea, e 'inega Yaubada ena luvine qabudi adi aqiaqi una ve'ifoqeyea veyoluba nana 'inega. ⁹* Yaubada ena luvine vonaya, "Ge una luabu be, ge una luve'aliga be, ge una vanawala be, ge una nuagovaqa." Ba'e luvine diavona ta wese vaina luvine adi bwagila luvine 'aidegana 'inega vonaya, "Tomotau ona veyolubedi 'idewani taumi oveveyolubemi!" ¹⁰* Vonahaqiaqi, veyoluba ilivuna ge wese ana fata be tomotau nagiveluveifedi, ta 'esi ilivu nana ana viaqa 'inega Yaubada ena nuanua ena luvine qabudi weaqidi adi aqiaqi kana ve'ifoqeyea.

¹¹* Egwavo, ba'e yani diavona ona viaqidi, mana oalamani aqiaqiea tuta luveifana 'inaya ka-toatoa. 'Inega ge ona 'eno motaiva, mana ada 'etoyavua bwa'obwa'o ana visiqayavo 'inega ni'a vadi'weda. Vonahaqiaqi, lova tuta nana kave'ale Iesu kavetumaqanea, e 'inega 'etoyavua nana ana 'aubena tufwana luluvai 'idega, ta ba'itagana ni'a mai di'wedaya. ¹²* Tuta goyona 'inaya ilivu luveifana ana tuta nahawala ta 'etoyavua ana 'aubena namai 'idaya, 'inega velovelovana ilivuna 'inaya ge ona toa. Ta 'esi emi ilivu luveifadi ona nogedi ta ona veyavuledi kavona kaleko bwavub-wavudi 'idewani. Nuanuagu ilivu simasimatal-idi 'idiega ona vebaba 'idewani toveilivu aqiaqidi ivevebaba. Ta ba'e ilivu diavona 'idiega Yaubada navabodebodemi Seitani ena nuanua luveifadi 'idiega.

* **13:9:** 'Ifo 20:13-15,17; Luve 5:17-19,21 * **13:10:** 1Kol 13:4-7

* **13:11:** Efe 5:14; 1Te 5:6-7 * **13:12:** 1Ion 2:8

13 * Nuanuagu kana veilivu aqiaqi be yaqisa tomotau qabudi ina 'iteda 'inega ina 'awahaqiaqieda eda ilivu simasimalidi 'idiega. E 'inega ge ona lugu tonuma edi toa va'auta 'idia be go'ila waiwaina ona numa 'oda'odaqa be 'inega 'unu'unumi ina luveifa. Ta wese ge ona velamo'eno kavokavovo be, ge ona ve'ae'aetoga be, wese nuagovaqa ilivuna 'idia ge ona awafelemi! 14 * Ta 'esi luaqiaqieda be kana awafeleda eda Kaiwabu Ieisu Keliso 'inaya, ta ena ilivu 'inega kana vekaleko be yaqisa eda nuanuayavo qabudi tauna na'abiluvinedi, e 'inega tomotau Ieisu ina 'itea ita'a eda ilivu aqiaqidi 'idiega. 'Inega ge wese emi nuanua ona awafeledi ilivu bwavubwavudi be nuanua luveifadi adi viaqayavo 'idia.

14

Tomotau ge kana awawebuiedi

1 * Tomeqabu edi vetumaqana dawalilina ona 'awahaqiaqiedi, ta ge wese ona ve'ae'aetoga taudi maega 'eguma vaina yani weaqidi ivenuana mag-ilafu ta omi'a ba'e yani diavona weaqidi emi nuanua dumadumana. 2 * 'Ebevetalatutula ba'e ona noqolia: Taha toga ena vetumaqana 'inega 'abwaga qabuna 'awahaqiaqiedi be 'ai'ainidi. Ta wese mali tomotau ena vetumaqana 'inega ge nuanuana yubai na'ainidi, mana 'eguma yubai na'ainia e 'inega ana lutonova naluveifa Yaubada matanaya. 3 * 'Inega tomeqabu edi nuanua 'inega

* 13:13: Lk 21:34; Efe 5:18 * 13:14: Gal 3:27 * 14:1: Lom 15:7
 * 14:2: Nug 9:3-4 * 14:3: Kol 2:16

yani qabuna i'awahaqiaqiea be i'ai'ainidi, ge daluaqiaqiedi be mali tomotau ina awawebuiedi 'eguma vaina yani ge nuadi be ina 'ainidi. Ta wese 'idewani tomeqabu vaina yani ge ida 'ainidia, adi luaqiaqi be ediavo ge ina 'awaluveifedi 'eguma yani qabuna i'ai'ainidi. Mana Yaubada qabu magilafudina ni'a 'awahaqiaqiedi. ⁴ * Ge wese daluaqiaqieu be Yaubada ena tofewa una luvinea ba'e yani diavona weaqina, mana tauna Kaiwabu ena tofewa, 'inega ena Kaiwabu ana luaqiaqi be ena viaqayavo na'awahaqiaqiedi nage na'awaluveifedi. Ta tofewa nana ana fata yani qabuna aqiaqina naviaqia, mana Kaiwabu ena waiwai 'inega fewafewa.

⁵ * Taha wese 'ebevetalatutula ena neimi: Vaina tomotau ivonaya be vaina 'aubena gwalagwaladi be kana nuanua qiduana weaqidi, ta 'abiboda mali 'aubena. Ta vaidi ivonaya be 'aubena qabudi ge wese ida vedumaduma. 'Inega omi'a ge ona luvinedi, mana ba'e yani nana weaqina tomotau 'aidega 'aidega taunega ena nuanua navetonova aqiaqiea be 'inega ana fata navonaya, "E vonahaqiaqi, 'aubena taha taha adi alamani ba'e 'idewani!" ⁶ Tomeqabu inuanua be taha 'aubena 'inaya ina tafwalolo, e 'inega eda Kaiwabu 'inaya itafwatafwalolo. Ta tomeqabu 'abwaga be yubai taha taha i'ai'ainidi, e taudi eda Kaiwabu ana 'amayaba weaqina i'ai'ai, mana ilulukaiwa Yaubada 'inaya 'abwaga nana weaqina. Ta tomeqabu vaina 'abwaga inogenogedi Kaiwabu ana 'amayaba weaqina, taudi wese nuan-

* **14:4:** Md 7:1; Iem 4:11-12 * **14:5:** Gal 4:10-11

uadi Kaiwabu ina giveqaiaweā, mana taudi wese ilulukaiwa Yaubada 'inaya adi 'abwaga weaqina.

7 Ita'a tomotau ge taudega ada giveqaiawa weaqina kada toatoa, ta 'esi katoatoa Yaubada sabi giveqaiawana yawaida 'inega. Ta wese 'idewani ge daluaqiaqieda be tauda eda nuanua 'inega kana luvine ma'oda kana 'aliga 'aiqa, nage totutaya kana 'aliga, ta 'esi Yaubada ena nuanua 'inega kana 'aliga be kana giveqaiaweā. 8* Vonahaqiaqi, 'eguma nawale mayawaida katoatoa, e 'inega Yaubada kana giveqaiaweā yawaida 'inega. Ta 'eguma kana 'aliga, e 'inega eda Kaiwabu kana giveqaiaweā 'aliga nana 'inega. 'Inega ge taha tola'ai 'eguma mayawaida nage 'ali'aligida, mana ita'a qabuda Kaiwabu ena tomotauyavo. 9 Ba'e 'iuna weaqina Keliso 'aliga weaqida ta 'abibodanaya ya'itoto 'evivi, yaqisa ana fata be nave-Kaiwabu ita'a mayawaida weaqida be wese to'aliga weaqidi.

10* 'Inega tola'ai weaqina omi'a me Diu taudi ge me Diu tovetumaqana oluluvinedi edi ilivu weaqina? Ta wese omi'a ge me Diu tola'ai weaqina me Diu ovonavona webuiedi taudi edi ilivu weaqina? Nawale Yaubada natoabui luvine ana 'ebetoa 'inaya, ta ita'a qabuda kana tovolu matanaya be naluvineda. 11* Mana Buki Nugwenugweina 'inaya Aisea Yaubada ena vona simanea vonaya,
 "Kaiwabu vonaya,
 'Yavona fofofola aqiaqiemi,

* 14:8: Gal 2:20 * 14:10: 2Kol 5:10 * 14:11: Ais 45:23; Fil 2:10-11

tomotau qabudi tuqatuqadiega
 ina sobadi mataguya,
 ta meadiega ina simana 'ifoqe
 vonigo ya'a Yaubada Otaqa.'”

12 'Inega kana alamani aqiaqiea, tomotau taha taha taudega eda viaqayavo be eda vonayavo ta wese eda nuanuayavo qabudi weaqidi kana simana 'ifoqeyedi Yaubada 'inaya.
 13 Vonahaqiaqi, Yaubada tomotau qabuda naluvineda, 'inega omi'a ge tomotau ona luvinedi edi toa vataya weaqina. Ta 'esi taumiega ona vonemia, “Ge taha tuta wese iagu taha ena givebe'uyei be 'inega luveifana naviaqi.”

14 * Ya'a eda Kaiwabu Ieisu maega ni'a ave'aidega, 'inega yahalamani aqiaqiea ge taha 'etoboda da'eno'eno 'abwaga nage yubai adi 'ai weaqidi. Ta 'eguma taha toga ena vetumaqana 'inega nanuaia be vaina 'abwaga nage yubai ge daluaqiaqiei be na'ainidi, e 'inega tauna 'inaya 'abwaga nana be yubai nana yani luveifana. 15 * Ta 'eguma taha iau tovetumaqana eu 'ai 'inega ana lutonova ge aqiaqina, e 'inega 'amayaba ilivuna ge uda viaqia 'inaya. Ta una nuave'avinia Keliso 'aliga tomotau nana weaqina, 'inega ena veiaiana Yaubada maega ge una givelua'ui eu 'ai 'inega. 16 'Inega o'a nage nuanuau vaina 'abwaga una 'ainidi, ta iau ena vetumaqana weaqina 'abwaga nana unogea, mana ge nuanuau iau ana lutonova una giveluveifei. E ba'e noga nana 'inega tomotau ina 'awahaqiaqieu. 17 Mana eda 'ai be eda numa ge taha yani qiduana 'eguma Yaubada

* 14:14: Via 10:15; Tai 1:15 * 14:15: 1Kol 8:11-13

ena luvine 'ayanaya katoatoa. Ta 'esi eda toa tunutunuqina edavo maega, be nuadaumwala ta wese qaiawa Niboana Gwalagwalana ena iula 'inega yani qidua otaqina Yaubada 'inaya. ¹⁸ Ta 'eguma taha toga Keliso weaqina fewafewa ba'e ilivu diavona 'idiega, e 'inega Yaubada naqaiawa weaqina, ta wese tomotau ina 'awahaqiaqiea.

¹⁹ * 'Inega ita'a tovetumaqana kana vetafe'wa waiwai toadaumwala weaqina 'ekalesia nuani-naya, ta tuta qabuna ma edavo kana givewai-waieda vona iula 'idiega.

²⁰ * Yaubada ena viaqayavo tovetumaqana 'idia ge una qeuni eu 'ai 'inega. Ta una nuave'avinia, 'abwaga be yubai be yani qabuna 'ai'aidi ge taha luveifana 'idia da'eno'eno. Ta o'a luveifana una viaqia 'eguma eu 'ai 'inega taha tomotau una gibebe'uyei be 'inega ena vetumaqana nanogea. ²¹ 'Inega ge daluaqiaqieu be yubai una 'ai, nage 'oine una numa, nage yani taha taha una viaqidi 'eguma viaqa diavona 'idiega ana fata be tovetumaqana taha una gibebe'uyei.

²² Nage o'a eu vetumaqana 'inega unuanua be eu viaqayavo qabudi yani aqiaqidi Yaubada matanaya. E 'inega luaqiaqieu be eu nuanuayavo una a'udi o'a be Yaubada nuanimia. Vonahaqiaqi, Yaubada me ena qaiawa qiduana weaqiu 'eguma eu viaqayavo 'idiega au fata be ge wese 'wamomo una lutonovi matanaya, mana ualamani aqiaqiea yani aqiaqina uviaviaqidi. ²³ Ta 'eguma taha toga navenuana magilafu vaina yani adi 'ai weaqina, e 'inega luaqiaqiea be yani diavona ge wese

* **14:19:** Lom 12:18; 15:2 * **14:20:** 1Kol 8:13

na'ainidi. Ta 'eguma na'alataya be na'ainidi, e 'inega luvine nalobea Yaubada matanaya, mana 'eguma ena viaqa ge dave'aidega ena vetumaqana maega, e 'inega luveifana ni'a viaqia.

15

Mali tomotau kana a'unugwetedi ta 'abiboda ita'a

¹ Vaina 'idega eda vetumaqana waiwaina eda 'ai be yani taha taha weaqidi. Ta luaqiaqieda be ge taudega eda nuanua kana viaqidi, ta 'esi tomeqabu edi vetumaqana dawalilina 'abwaga be 'ai weaqidi kana iuledi. ² * 'Inega ita'a 'aidega 'aidega luaqiaqieda be mali tomotau kana giveqaiawedi edi nuanua ana viaqa 'inaya. Mana 'eguma edi nuanua kana viaqia, ta viaqa nana 'inega iula ina lobea, e 'inega kana givewaiwaiedi edi vetumaqana eda Kaiwabu 'inaya weaqina. ³ * Ba'e yani diavona kana viaqidi, mana Keliso tauna eda 'ebevetalatutula. Tauna ge danuanua ena qaiawa be ena nuanuayavo weaqidi, ta tuta nana tomotau i'awaluveifea 'inega ge danuanua ena toa aqiaqina weaqina, ta 'esi Tamana ena nuanua viaqia. Buki Nugwenugweina ba'e weaqina simana vonaya, "Tomeqabu i'awaluveifeu, ya'a wese i'awaluveifegu." ⁴ * Ba'e yani diavona weaqina lova Buki Nugwenugweina 'inaya Yaubada ena tovesimasimanayavo i'wayavia sabi ve'itada. Ta ba'e vona diavona wese adi fata ina givewaiwaieda eda lu'ita vane 'inaya Yaubada

* 15:2: 1Kol 10:24,33 * 15:3: Same 69:9 * 15:4: 2Tim 3:16

ena vona fofofola weaqina, ta me eda bibitaqo kaba'eba'eyedi.

⁵ Ba'e waiwai nana be wese bibitaqo nana Yaubada 'inega ka'ewea, 'inega yavevenoqi 'inaya be naiulemi 'inega toadaumwala ilivuna 'inaya ma emiavo ona toatoa. Ta Iesu Keliso ena ilivu be ena nuanua yawaimi 'inega ona veilivuyea 'aidega 'aidega nuanimia. ⁶ 'Inega ami fata be qabumi ona luvetuba ta bonami 'aideganega eda Kaiwabu Iesu Keliso Tamana Yaubada ona awatuboya.

⁷ * 'Inegana omi'a me Diu ta wese omi'a ge me Diu taumiega ma emiavo ona 'awahaqiaqiemi, 'idewani Keliso ni'a 'awahaqiaqiemi, ta ba'e 'inega Yaubada awatubo nalobea emi ilivu aqiaqina 'inega. ⁸ * Ta ona nuave'avinia Keliso mai kavona tofewa kavovo 'idewani me Diu 'idia sabi ve'itadi vonigo Yaubada ena vona fofofola qabudi vonahaqiaqi, ta ge taha 'idiega ana fata be nabwegei. ⁹ * Ta wese mai be yaqisa taudi mali qabu adi fata Yaubada ina awatuboya ena nuakolokolo qiduna 'idia weaqina. Ba'e weaqina kini Deibida Buki Nugwenugweina 'inaya vonaya, "Ya'a nuanuagu ena awatubou taudi mali qabu nuanidia. Ta 'evosiega au wawa ena awatuboya."

¹⁰ * Ta wese Mosese Buki Nugwenugweina 'inaya vonaya, "Omi'a ge me Diu ona qaiawa Yaubada ena tomotauyavo

* **15:7:** Lom 14:1 * **15:8:** Md 15:24 * **15:9:** Via 3:25; 2Sam 22:50; Same 18:49
 * **15:10:** Luve 32:43

taudi me Diu maega.”

11 * Ta wese Deibida vonaya,
 “Omi’a ge me Diu qabumi
 Kaiwabu ona awatuboya,
 ta wese tomotau qabumi
 bwa’obwa’oya ona awatuboya.”

12 * Ta wese Yaubada ena tovesimasimana Aisea vonaya,
 “Nawale Iese ena gade ’inega
 taha toga na’ifoqe navetoluvine,
 ta tauna tomotau qabudi naluvinedi,
 ta taudi ge me Diu ina lu’ita vane ’inaya.”

13 ’Inega yavevenoqi weaqimi Yaubada tauna emi lu’ita vane ana Tonei nagiveqaiawemi ta wese nuadaumwala naneimi, mana tauna ovevetumaqanea. Ta wese nuanuagu lu’ita vane nana nave’ena’i, ta ’imiega na’afwataiwaqa Niboana Gwalagwalana ena waiwai ’inega.

Faulo ena ’wayavi ’iuna

14 Taigwavo be novugwavo, yahalamani aqiaqiea Yaubada ena nuakolokolo ’inega tuta qabuna ilivu aqiaqi otaqidi oviaviaqidi. Ta tola’ai Yaubada nuanuana be ona alamania, e yani diavona ba’e ni’a oalamani aqiaqiedi ’inega ami fata mali tomotau yani diavona ba’e oveve’itedi.

15-16 * Vonahaqiaqi, ilivu aqiaqidi tuta qabuna ovevefewedi, ta tua me egu giwalifatu nuanuagu ba’e yani diavona weaqidi wese ena vebibina ’eviviemi. Egu nuanua ba’e, mana ya’a Yaubada ena nuakolokolo ’inega yavetovaletoyana leisu

* 15:11: Same 117:1 * 15:12: Ais 11:10; Ve 5:5 * 15:15-16:
 Lom 1:5; 11:13

Keliso weaqina omi'a ge me Diu weaqimi. 'Inega Ieisu Valena Aqiaqina yamiea 'imia ta kavona toveguba yavegubayemi 'idewani guba meilana aqiaqi otaqina Yaubada matanaya. Ta ba'e 'inega qaiqaiawa weaqimi, mana Niboana Gwalagwalana 'inega ni'a ovevunavunaqa. ¹⁷ 'Inega yaqaiawa qiduana egu fewa Yaubada weaqina, mana ya'a Ieisu Keliso maega. ¹⁸ Ge nuanuagu ena vonavane yani taha taha weaqidi, ta 'esi nuanuagu be ena vonavane Keliso ena viaqayavo 'iguyega weaqidi. Vonahaqiaqi, ya'a taudi mali qabu ni'a yamiedi Yaubada 'inaya Vale Aqiaqina ana lugaihi 'inega ta wese egu ilivu aqiaqina 'idia 'inega. Ta ba'e lugaihi nana 'inega Yaubada ivelumamatayagea. ¹⁹ Taudi mali qabu inuagivila Yaubada ena viaqa 'ebenuavoqana 'idiega, ta ba'e yani diavona Yaubada viaqidi 'iguyega, ta ive'ebe'ita mali qabu 'idia Yaubada ena waiwai weaqina. Ta ba'e yani diavona i'ifoqe Niboanina Gwalagwalana ena waiwaiega. Vonahaqiaqi, Keliso Valena ni'a yalugaihiea 'abaga qiduana Ielusalema 'inega be luvivila tauya ana laba di'we agona Ililikumi 'inaya, ta ba'e luvivila nana 'inega Yaubada ena nuanua weaqigu yaviaqa 'ovoia.

²⁰ * Ya'a egu nuanua waiwaina be ena lugaihiea 'abaga diavona lova ge taha toga Keliso ana wawa dalugaihiea 'idia. 'Inegana ge nuanuagu be Vale nana ena lugaihiei taha 'abaga 'inaya 'eguma taha tomotau 'ekalesia ni'a 'wadia 'abaga nana 'inaya. Mana 'eguma 'abaga nana 'inaya ya'a

* **15:20:** 2Kol 10:15-16

wese ena lugaihi, e 'inega kavonaya be taha to-
motau ena avutugu dakakali ta ya'a nonoqina
'inaya egu vanue eda yoqoni. ²¹ * 'Inega ya'a
Buki Nugwenugweina ena vona Keliso weaqina
ya'abi'abibodea vonaya,

“Tomeqabu Vale nana
ge taha toga dasimanei 'idia,
e taudina ina alamani aqiaqiea.
Ta wese tomeqabu lova Vale nana
ge ida noqolia,
e taudina nuadi na'eqa'uya
Vale nana weaqina.”

Faulo nuanuana me Loma navayausidi

²² * Vonahaqiaqi, lova nuanuagu be eda
vayausimi, ta ge agu fata mana yalugaihi dadana
'abaga diavona 'idia, 'inega ya'ive'ove'o wawasai.
²³ Tuta kuena yaba'eba'e sabi wai be ena 'itemi.
Ta ba'e 'itagana egu fewa Yaubada weaqina ni'a
yalu'ovoia ba'e di'we diavona 'idia, e 'inega
ba'e tuta nana 'inaya nuanuagu qiduana be
ena vayausimi emi 'abaga Loma 'inaya. ²⁴ Ta
yanuanua be nugweta ena tauya di'we qiduana
Sifeini 'inaya. Ta tauya nana nuaninaya ena 'ita
nugwetemi. Ta eda toa 'inaya kana veiaiana ta
kana toa tufwana tuta kuena, ta tuta nana ena
nogemi e ona iulegu mane 'inega egu tauya nana
weaqina.

²⁵⁻²⁶ * Vonahaqiaqi, ena wai ta nugweta
luaqiaqiegu be ena tauya Ielusalema 'inaya
ta 'abaga nana ana tovetumaqanayavo adi nei

* **15:21:** Ais 52:15 * **15:22:** Lom 1:13 * **15:25-26:** 1Kol 16:1;
2Kol 8:1; 9:2,12; Via 24:17

kavovo me Masidonia ta wese me Akaya 'idiega ena neidi. Edi nuanua qiduana be ina iuledi, mana Ielusalema ana 'ekalesia edi toa vitana valena inoqolia, 'inega nuanuadi qiduana ina veyolubedi mane 'inega. ²⁷ * Ba'e nei kavovo nana me Guliki me edi qaiawa ivegogonea me Ielusalema weaqidi, mana lova Ieisu Valena Aqiaqina i'ewea me Diu tovetumaqana itoatoa Ielusalema 'inaya 'idiega, ta ba'e Vale nana 'inega me Guliki niboanidi igiveqaiawedi. 'Inega me Guliki adi lutonova kavona adi loaga da'eno'eno me Diu 'idia, e 'inega nuanuadi ina iuledi edi toa vitana 'inaya mane nana 'inega. ²⁸ Vonahaqiaqi, me Guliki edi iula aqiaqi otaqina me Ielusalema weaqidi ya'a taugu nimaguyega ena ve'ifoqeyea 'idia. Ta 'abibodanaya ena tauya Sifeini weaqina e 'inega ena lugu emi 'abaga Loma 'inaya be ena vayausimi. ²⁹ * Ta yahalamani aqiaqiea egu wai nana 'inaya Keliso ena veyoluba qiduana vuaqina qabuda kana lutonova aqiaqiea.

³⁰ * Egwavo, ita'a qabuda eda Kaiwabu Ieisu Keliso ena tomotauyavo. Ta wese Yaubada Niboanina Gwalagwalana 'inega ita'a 'aidega 'aidega veyoluba ilivuna kaviaviaqia nuanidaya. 'Inega yanoqinoqiemi be Yaubada 'inaya ona venoqi waiwai egu tauya Ielusalema 'inaya weaqina, be 'inega ge taha vita ena lobei di'we nana 'inaya. ³¹ Nuanuagu be ona venoqi weaqigu be yaqisa Yaubada nava'abo'abogu di'we Iudia ana totoayavo taudi Yaubada ge ida matayagea 'idiega. Ta wese ona venoqi be

* 15:27: 1Kol 9:11 * 15:29: Lom 1:11 * 15:30: 2Kol 1:11;
Kol 4:3; 2Te 3:1

yaqisa di'we nana ana tovetumaqanayavo nei kavovo nana me Guliki 'idiega ina 'awahaqiaqiea ta me edi qaiawa ina 'ewea. ³² Ba'e yani diavona weaqidi nuanuagu ona venoqi weaqigu. 'Inega 'eguma Yaubada nahawafelegu me egu qaiawa ena wai 'imia. Ta wai nana 'inaya taudega kana vona iuleda be kana givewaiwaieda. ³³ Egu nuanua qiduana be nuadaumwala ana Yaubada omi'a qabumi naiulemi ta maega ona toatoa. Vonahaqiaqi, egu nuanua 'idewani.

16

Faulo ena lukaiwa enavo 'idia

¹ Nuanuagu ena vematamagilafuyemi novuda Foebi weaqina. Ta ona alamanía novuda nana vavine aqiaqina Yaubada ena fewa 'inaya, 'inega ya'awahaqiaqiea. Tauna 'ekalesia taha ana wawa Senikila ana dikoni. ² Ta nuanuagu ona 'ebe'ewea ita'a tovetumaqana eda ilivu 'inega, mana tauna wese eda Kaiwabu ena tomotau taha. Ta 'eguma taha yani 'inega nakusa, e 'inega ona 'abivitea, mana tauna 'evisa tomotau ni'a iuledi edi nuanua taha taha 'idia, ta ya'a wese iula qiduana ni'a yalobeá 'inega.

³* Nuanuagu Filisila ma moqanedi Akwila egu lukaiwa ona simanayea 'idia. Lova magilafudina maega afewa Iesu Keliso weaqina.

⁴ Vonahaqiaqi, vaina tuta veilage yalobeá ta taudi tuta diavona 'idia ge ida nogegu, ta 'esi magilafudina i'ali'aliga 'waqi weaqigu. Ta ge agu 'aidega eda lulukaiwa 'idia edi iula weaqina, ta 'esi taudi mali qabu edi 'ekalesia

* **16:3:** [Via 18:2](#)

qabuna 'inega wese ilulukaiwa 'idia iula nana weaqina.

5 Ta wese egu vekaiwa ona simanea tovetumaqana qabudi 'idia ivava'auta Filisila ma moqanedi edi vanuea.

Ta wese ia otaqigu Efenetusi egu lukaiwa ona vonea. Tauna di'we Eisia 'inega maduветumaqana Ieisu 'inaya, ta 'abiboda vaidi tomotau.

6 Novuda Meli egu lukaiwa ona simanea 'inaya. Tauna vetafe'wa waiwai omi'a sabi iulami.

7 Ta wese egu tomotauyavo Anidokosi be Iunia egu lukaiwa 'idia. Lova taudi vanue 'ebeyoqona 'inaya maega atoa. Taudi adi 'awahaqiaqi be adi 'amayaba ilobelobea Ieisu ena tovaletuyanayavo qabudi 'idiega. Magilafudina Keliso imaduvetumaqanea, ta 'abiboda ya'a.

8-9 Iagu Amifilatusi wese egu lukaiwa ona simanea 'inaya. Iagu nana yaveyoluba aqiaqiea mana tauna wese Kaiwabu ena tomotau ya'a 'idewani.

Ta wese Ebanosi ona vekaiwa 'inaya, tauna lova maega afewa 'aidega Keliso weaqina.

Ta wese egu veyoluba ona simanea ia aqiaqigu Sitakisi 'inaya.

10 Ta wese Afelesi egu lukaiwa ona simanea 'inaya. Tauna 'oloto aqiaqina, ta vita taha taha ni'a vebaedi ta ena vetumaqana ge danogei, e 'inega Keliso 'oloto nana 'awahaqiaqiea.

Ta wese egu lukaiwa qiduana ona simanea tovetumaqanayavo qabudi 'idia Alisitobulusi

maega itoatoa ena vanuea.

11 Ta wese Elodioni egu lukaiwa ona simanea 'inaya, tauna wese Diu 'olotona 'idewani ya'a. Ta tovetumaqanayavo itoatoa iagu Nasiusi ena vanue 'inaya egu lukaiwa 'idia ona simanea.

12 Ta vivine magilafudi Tilifena be Tilifosa egu lukaiwa ona simanea 'idia, ba'e vivine diavona nawale ivevetafe'wa waiwai eda Kaiwabu weaqina.

Ta wese egu lukaiwa ona simanea Fesisi 'inaya, tauna wese ena fewa waiwaina eda Kaiwabu weaqina.

13 * Ta wese Lufasi egu vekaiwa ona simanea 'inaya, tauna to'abiboda aqiaqina eda Kaiwabu ena fewa 'inaya.

Ta inana wese egu lukaiwa 'idia. Vonahaqiaqi, iveilivu aqiaqiegu kavonaya be ya'a natu otaqidi.

14 Ta wese egu lukaiwa ona simanea Asinikilito be Filigoni be Elimesi be Fatalobasi be Elimasi ta wese Yaubada ena tomotauyavo qabudi maega itoatoa 'idia.

15 Ta wese egu lukaiwa ona simanea Filologusi ma moqanena Iulia be Nelusi ma novuna be Olimifasi ta wese tovetumaqana qabudi maega itoatoa 'idia.

16 * Ta omi'a to'ekalesia ma emiavo venima sicutuyega ona lukaiwa 'idewani ita'a tovetumaqana eda ilivu aqiaqina 'inega.

Faulo ena vebibina 'ebelu'ovoa

17 * Egwavo, wese taha yani weaqina nuanuagu

* **16:13:** Mk 15:21 * **16:16:** 1Kol 16:20; 1Fit 5:14 * **16:17:** Md 7:15; Tai 3:10

qiduana ena vonemi. Onoqoli, ona 'itamaki aqiaqiemu tomotau luveluveifadi weaqidi, mana taudi edi lugaihi be wese edi ve'ita 'inega 'ekalesia ana tovetumaqanayavo ivetoasi'iedi. Taudi edi ve'ita 'inega tovetumaqana edi vetumaqana igiveluveifea, mana edi ve'ita ge dave'aidega ve'ita tunutunuqina maega, 'idewani ve'ita nana lova ni'a o'ewea tove'ita aqiaqidi 'idiega. 'Inega taudi maega ge ona veiaiana, ta 'esi ona toasi'i 'idiega. ¹⁸* Ba'e tove'ita diavona ge eda Kaiwabu Keliso weaqina ida fewafewa, ta 'esi taudiega edi nuanua weaqina ifewafewa. Taudi edi vona yafayafa be wese vona adi noqola aqiaqina 'idiega tomotau iu'au'avedi, mana tomotau diavona ge ida alamania vonigo tove'ita dina edi vona ge Yaubada ena nuanua 'inega. ¹⁹* Tomotau qabudi ni'a ialamani aqiaqiea omi'a eda Kaiwabu ena vona ovematamatayagea, ta ba'e weaqina yaqaiawa 'ena'ina. Nuanuagu qiduana nuami na'eqa'u aqiaqiei be yaqisa ami fata yani qabuna aqiaqina ona viaqidi, ta ilivu luveifana adi viaqayavo ge nuanuagu ona viaqidi.

²⁰* Ta 'eguma toluveifa diavona ona nogedi, e 'inega nuadaumwala ana Yaubada tuta goy-ona ena waiwaiega Seitani naha'uwebuiea 'aqemi 'ayanaya ta navamemea.

Ta yavevenoqi weaqimi be eda Kaiwabu Ieisu Keliso ena veyoluba na'eno'eno omi'a 'imia.

²¹* Iagu Timoti maega afewafewa Keliso weaqina, ta tauna ena lukaiwa vetunei waiwai

* **16:18:** Fil 3:19; 2Fit 2:3 * **16:19:** Lom 1:8; 1Kol 14:20

* **16:20:** Nug 3:15 * **16:21:** Via 16:1-2; 19:22; 20:4

'imia. Ta wese egu tomotauyavo Lusiasi be Iasoni ta wese Sosifata inuaimi 'inega edi vekaiwa ivetunei waiwai 'imia.

²² Paulo ena leta ba'e ya'a Tetiasi ya'wayavia waiwai 'imia. Ta nuanuagu wese ena lukaiwa 'imia, mana ya'a wese taimi taha Keliso 'inega.

²³⁻²⁴ * Ya'a Paulo iagu Gaiasi ena vanuea ya-toatoa, ta wese tovetumaqana qabudi ba'idia ivava'auta tafwalolo weaqina. Ta tauna wese ena lukaiwa vetunei waiwai 'imia. Ta wese 'abaga nana ana mane ana to'itamaki ana wawa Ilasitasi lulukaiwa 'imia, ta wese 'idewani Kwatusi ena lukaiwa vetunei waiwai 'imia.

²⁵ * Yaubada ana fata be nagivewaiwaiemi, ta ba'e waiwai nana weaqina yavevelulu'uyayea tuta nana Iesu Keliso Valena Aqiaqina yalulugaihiea tomotau 'idia. Ta ba'e Vale nana Yaubada ena nuenuega 'waivea 'imiega tuta ana 'ebeve'ale 'inega. ²⁶ Ta ba'itagana ba'e Vale nana ana alamani Yaubada ni'a give'ifoqeyea taudi mali qabu koyadi 'idia di'we taha taha 'idia be yaqisa adi fata Keliso ina vetumaqanea ta ina matayagea. Ta ba'e yani diavona edi 'ifoqe weaqina lova tovesimasi-manayavo imadusimanea Buki Nugwenugweina 'inaya Yaubada Toatoa Vatayana ena luvine be wese ena nuanua 'inega. ²⁷ 'Inega luaqiaqieda be Yaubada kana awatuboya! Tauna ana 'aidega otaqa Toalamani aqiaqi. Vonahaqiaqi, Iesu Keliso ena viaqayavo 'idaya weaqina eda awatubo vataya Yaubada 'inaya na'eno'eno tuta qabuna 'idia. Vonahaqiaqi, eda nuanua 'idewani.

* **16:23-24:** Via 19:22; 1Kol 1:14 * **16:25:** Efe 1:9; 3:5,9; Kol 1:26; Lom 1:5

Molima New Testament
The New Testament in the Molima Language of Papua
New Guinea

Nupela Testamen long tokples Molima long Niugini

copyright © 2010 Folk&Språk and Swedish Mission Alliance

© 2010 Folk&Språk and Swedish Mission Alliance

Language: Molima

Translation by: Folk&Språk

Contributor: The Molima Translation Committee

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-12-09

PDF generated using Haiola and XeLaTeX on 21 Feb 2024 from source files dated 9 Oct 2020

fa4298de-51e6-508c-88a7-73c29a6d8004